

Қылмыстық-атқару жүйесі тергеу изоляторларының ішкі тәртіптеме қағидаларын бекіту туралы

Қазақстан Республикасы Ішкі істер министрінің 2017 жылғы 26 шілдедегі № 505 бұйрығы. Қазақстан Республикасының Әділет министрлігінде 2017 жылғы 25 тамызда № 15564 болып тіркелді.

"Адамдарды қоғамнан уақытша оқшаулауды қамтамасыз ететін арнаулы мекемелерде, арнаулы үй-жайларда ұстау тәртібі мен шарттары туралы" Қазақстан Республикасы Заңының 15-бабының 1-тармағына сәйкес БҰЙЫРАМЫН:

Ескерту. Кіріспе жаңа редакцияда – ҚР Ішкі істер министрінің 23.05.2022 № 369 (алғашқы ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.

1. Қоса беріліп отырған Қылмыстық-атқару жүйесі тергеу изоляторларының ішкі тәртіптеме қағидалары бекітілсін.

2. Қазақстан Республикасы Ішкі істер министрлігінің Қылмыстық-атқару жүйесі комитеті (А.Х. Базылбеков):

1) осы бұйрықты Қазақстан Республикасы Әділет министрлігінде мемлекеттік тіркеуді;

2) осы бұйрықты Қазақстан Республикасы Әділет министрлігінде мемлекеттік тіркеген күннен бастап күнтізбелік он күн ішінде оның көшірмелерін мерзімді баспа басылымдарында ресми жариялауға, сондай-ақ Қазақстан Республикасы нормативтік құқықтық актілерінің эталондық бақылау банкіне енгізу үшін Қазақстан Республикасы Әділет министрлігінің "Республикалық құқықтық ақпарат орталығы" шаруашылық жүргізу құқығындағы республикалық мемлекеттік кәсіпорнына жолдауды;

3) осы бұйрықты Қазақстан Республикасы Ішкі істер министрінің интернет-ресурсында орналастыруды;

4) осы бұйрықты Қазақстан Республикасы Әділет министрлігінде мемлекеттік тіркегеннен кейін он жұмыс күні ішінде осы тармақтың 1) және 2) тармақшаларында көзделген іс-шаралардың орындалуы туралы мәліметтерді Қазақстан Республикасы Ішкі істер министрлігінің Заң департаментіне ұсынуды қамтамасыз етсін.

3. Осы бұйрықтың орындалуын бақылау Қазақстан Республикасы Ішкі істер министрінің орынбасары полиция генерал-майоры Б. Бисенқұловқа және Қазақстан Республикасы Ішкі істер министрлігінің Қылмыстық-атқару жүйесі комитетіне (А.Х. Базылбеков) жүктелсін.

4. Осы бұйрық алғашқы ресми жарияланған күнінен кейін күнтізбелік он күн өткен соң қолданысқа енгізіледі.

Қылмыстық-атқару жүйесі тергеу изоляторларының ішкі тәртіптеме қағидалары

Ескерту. Қағидалар жаңа редакцияда - ҚР Ішкі істер министрінің 29.09.2025 № 729 (алғашқы ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.

1-тарау. Жалпы ережелер

1. Осы Қылмыстық-атқару жүйесі тергеу изоляторларының ішкі тәртіптеме қағидалары (бұдан әрі - Қағидалар) "Адамдарды қоғамнан уақытша оқшаулауды қамтамасыз ететін арнаулы мекемелерде, арнаулы үй-жайларда ұстау тәртібі мен шарттары туралы" Қазақстан Республикасы Заңының (бұдан әрі - Заң) 15-бабының 1-бөліміне сәйкес әзірленді және күдіктілерді, айыпталушыларды және сотталушыларды ұстау режимін қамтамасыз ету мақсатында Қазақстан Республикасы Ішкі істер министрлігі Қылмыстық-атқару жүйесі комитеті тергеу изоляторларының ішкі тәртіптемені айқындайды.

2. Осы Қағидалар:

- 1) күдіктілер, айыпталушылар және сотталушыларды қабылдау және камераларға орналастыру;
- 2) күдіктілер, айыпталушылар және сотталушыларды жеке тінту, дактилоскопиялау, суретке түсіру, сондай-ақ заттарын тексеруді жүргізу;
- 3) күдіктілер, айыпталушылар және сотталушылардан сақтауға және пайдалануға тыйым салынған заттарды, заттектерді және тамақ өнімдерін алып қою;
- 4) күдіктілер, айыпталушылар және сотталушыларды материалдық-тұрмыстық қамтамасыз ету;
- 5) күдіктілер, айыпталушылар және сотталушылардың тамақ өнімдерін, сондай-ақ бірінші кезекте қажетті заттар мен басқа да өнеркәсіптік тауарларды сатып алуы;
- 6) күдіктілер, айыпталушылар және сотталушыларға сәлемдемелер, сәлем-сауқаттар қабылдау және тапсыру;
- 7) күдіктілер, айыпталушылар және сотталушылардың жеделхаттар, хаттар, ақшалай аударымдарын алу және жіберу;
- 8) күдіктілер, айыпталушылар және сотталушылардың ұсыныстар, арыздар және шағымдар жолдау;
- 9) күдіктілер, айыпталушылар және сотталушылардың діни жоралар жасауы;
- 10) күдіктілер, айыпталушылар және сотталушыларды еңбекке тарту;

- 11) күдіктілер, айыпталушылар және сотталушылардың отбасылық-құқықтық қатынастарға және азаматтық-құқықтық мәмілелерге қатысуы;
 - 12) күдіктілер, айыпталушылар және сотталушылардың газеттер мен журналдарға жазылуын жүргізу;
 - 13) күдіктілер, айыпталушылар және сотталушыларды медициналық-санитариялық қамтамасыз ету;
 - 14) күдіктілер, айыпталушылар және сотталушылардың күн сайын серуенге шығарылуы;
 - 15) күдіктілер, айыпталушылар және сотталушылардың қорғаушылармен, туыстармен және өзге де адамдармен жолығысуын өткізу;
 - 16) күдіктілер, айыпталушылар және сотталушылардың тергеу әрекеттері мен сот отырыстарына қатысуын қамтамасыз ету;
 - 17) күдіктілер, айыпталушылар және сотталушыларға көтермелеу мен жазалау шараларын қолдану;
 - 18) күдіктілер, айыпталушылар және сотталушыларды тергеу изоляторы басшысының және ол уәкілдік берген адамдармен жеке қабылдауы;
 - 19) тергеу изоляторда қайтыс болған күдіктілер, айыпталушылар және сотталушылардың мәйіттерін беру;
 - 20) күдіктілер, айыпталушылар және сотталушыларды күзеттен босату тәртібін айқындайды.
3. Әрбір тергеу изоляторында тергеу изоляторы бастығының немесе оны алмастыратын адамның бұйрығымен бекітілген күдіктілердің, айыпталушылардың және сотталушылардың сол не өзге де құрамымен жұмыс істеу ерекшелігін, жыл мезгілін, жергілікті және басқа да мән-жайларды ескере отырып, қатаң регламенттелген , орындалуға және сақталуға міндетті күн тәртібі ұйымдастырылады. Күн тәртібінде сегіз сағаттық үзіліссіз ұйқы, ұйқыдан тұру, дәрет алу, тамақтану, серуендеу, жұмыс, тәрбиелік іс-шаралар, ұйқыға жату көзделеді.
4. Күдікті, айыпталушы немесе сотталушы тергеу изоляторында жұмыс уақытында ғана жауап алынады, бұл ретте 21 сағаттан кешіктірмей камерасына қайтарады.
5. Тергеу изоляторларында ұсталатын адамдар осы Қағидаларға 1-қосымшаға сәйкес күдіктілер, айыпталушылар және сотталушылардың мінез-құлық қағидаларын сақтайды.
- Күдіктілер, айыпталушылар және сотталушылардың мінез-құлық қағидаларын бұзуының, сотталғандардың жазаны өтеу тәртібін бұзуының алдын алу және жолын кесу, азаптауларға және өзге де құқыққа қарсы әрекеттерге жол бермеу мақсатында бейнекамералар дәретханаларды, қол жуатын және себезгі бөлмелерін, моншаларды және ұзақ мерзімді кездесу бөлмелерінің жатын үй-жайларын қоспағанда, комиссия

айқындайтын орындарда орнатылады. Бұл ретте күдіктілерді, айыпталушыларды, сотталушыларды және сотталғандарды сыртқы дене тексеруі жүзеге асырылатын үй-жайлар шымылдықтармен жабдықталады.

Әйелдерді ұстауға арналған үй-жайларда бейнебақылау операторлары әйел жынысты қызметкерлерден тағайындалады.

Бейне мұрағатты сақтау мерзімі кемінде 60 тәулікті құрайды.

Бейнежазбалардың көшірмелерін беру қылмыстық-атқару жүйесінің жоғары тұрған органдарының, қылмыстық қудалау органдарының, соттың, прокуратураның, сондай-ақ Қазақстан Республикасы Қылмыстық-процестік кодексте (бұдан әрі - ҚПК) көзделген тәртіпте адвокаттардың және жәбірленушілерінің өкілдерінің ресми сұрауы бойынша жүргізіледі.

6. Осы Қағидаларға 2-қосымшаға сәйкес нысан бойынша тергеу изоляторында тексеруші адамдардың ескерту және ұсыныс кітабы жүргізіледі, оған тексеруші адам ескертулерін, ұсыныстарын және кемшіліктерді жою жөніндегі іс-шараларды орындау мерзімдерін енгізеді.

2-тарау. Күдіктілер, айыпталушылар және сотталушыларды қабылдау және камераларға орналастыру тәртібі

7. Күдікті, айыпталушы немесе сотталушыны тергеу изоляторына қабылдау үшін ҚПК-нің 147-бабына сәйкес күзетте ұстау түріндегі бұлтартпау шарасына алу туралы соттың қаулысы негіз болып табылады.

8. Тергеу изоляторына түскен күдіктілер, айыпталушылар және сотталушылардың қабылдау тергеу изоляторы бастығының кезекші көмекшісі (бұдан әрі - кезекші көмекші) немесе оның орынбасарымен тәулік бойы жүргізіледі, ол:

1) мыналарды:

тергеу изоляторына жеткізілген адамды қабылдауға негізі бар іс жүргізу құжаттарының барын тексереді;

қамауға алынған адамдардың жеке ісінде тігілетін жеке басын куәландыратын құжатының барын тексереді, олар қажет болған жағдайда арнайы есепке алу бөлімі қылмыстық процесті жүргізуші органға, кейіннен қайтарумен беріледі;

туу туралы куәлік немесе баланың медициналық ұйымда туғанын растайтын құжаттары, баланы асырап алу құжаты, ал мұндай құжаттар болмаған жағдайда қылмыстық іс жүргізуге берілген анықтау жүргізетін адамның, тергеушінің, прокурордың немесе соттың жазбаша нұсқауы болуын тексереді (үш жасқа дейінгі баласы бар әйелді тергеу изоляторына қабылдау үшін).

2) аталған адаммен сұрау жүргізеді және оның жауаптарын оның жеке ісіндегі деректермен салыстырады;

3) кезекші дәрігермен бірлесіп медициналық қарау жүргізеді.

9. Тергеу изоляторына судьяның не соттың күзетпен ұстау түріндегі бұлтартпау шарасын таңдау туралы қаулысынан көшірме ұсынылған жағдайларда, көшірме лауазымды адамның қолымен куәландырылып, елтаңбалы мөр қойылады және үш жұмыс күнінен кешіктірілмей қаулының көшірмесін ауыстыруға жатады.

10. Транзитпен айдауылданған күдіктілер, айыпталушылар және сотталушылар тергеу изоляторына қабылданады және Қазақстан Республикасы Ішкі істер министрінің 2017 жылғы 13 ақпандағы № 107 бұйрығымен бекітілген (Нормативтік құқықтық актілерді мемлекеттік тіркеу тізілімінде № 14918 болып тіркелген) Қазақстан Республикасы Ішкі істер министрлігі қылмыстық-атқару жүйесі мекемелерінде ұсталатын адамдардың есебін жүргізу қағидаларына сәйкес жолшыбай тізіміне және жеке ісі бойынша анықтама негізінде белгіленген жерге жіберіледі.

11. Қылмыстық істері бойынша тергеу кезіндегі ұстау мерзімі аяқталған және ұзартылмаған күдіктілер, айыпталушылар және сотталушылар тергеу изоляторына қабылданбайды. Күзетпен ұстау мерзімдері аяқталған адамдар тергеу изоляторына қабылданғаннан кейін тергеу изоляторы бастығының қаулысы бойынша жоспарлы айдауылдан босатылады.

12. Тергеу изоляторына қабылданған адамдар келіп түскен күні, бірақ бір тәуліктен кешіктірмей алғашқы медициналық куәландырудан және санитариялық тазалаудан өтеді. Медициналық куәландырудың нәтижелері медициналық амбулаториялық картаға енгізіледі.

13. Санитариялық тазалаудан өткеннен және медициналық куәландыру нәтижелерін алғаннан кейін күдіктілер, айыпталушылар және сотталушылар төсек жабдықтарын, сондай-ақ маусым бойынша киім-кешекті (өз киім-кешегі болмаған жағдайда) алады.

Уақытша оқшаулау жайына, тәртіп изоляторына орналастырылған кәмелеттік жасқа толмаған адамдар киімдерін ауыстырады. Оларға тиесілі киімдері алынады және сақтауға беріледі.

14. Тергеу изоляторына қабылданған күдіктілер, айыпталушылар және сотталушылар құқықтары мен міндеттері, күзетте ұстау режимі, тәртіптік талаптар, ұсыныстарды, өтініштер мен шағымдарды беру тәртібі туралы ақпаратпен қол қою арқылы танысады.

15. Қарауылдан (айдауылдан) қабылданған жеке істерді ресімдеу кезінде күдіктілер, айыпталушылар және сотталушылар оқшаулау тәртібін сақтай отырып, жинақтау бөлімшесінің камераларына бір тәуліктен аспайтын мерзімге не орындықтармен және жасанды жарықпен жабдықталған бір орындық бокс бөлмесіне екі сағаттан аспайтын мерзімге орналастырылады.

16. Күдіктілер, айыпталушылар және сотталушыларды камералар бойынша орналастыру осы Қағидаларға 3-қосымшаға сәйкес нысан бойынша камераларда

орналастыру жоспары негізінде Заңның 32-бабының талаптарына сәйкес жүзеге асырылады. Тергеу изоляторының әкімшілігі олардың арасындағы байланысты болдырмау бойынша шаралар қабылдайды.

Жаңа келген күдіктілер, айыпталушылар және сотталушыларды тергеу изоляторында ұстау тәртібімен және жағдайымен таныстыру, сондай-ақ денсаулығының жағдайын тексеру және санитариялық-гигиеналық іс-шараларды жүргізу, олармен психологиялық тексерістерді жүргізу мақсатында көрсетілген адамдар 15 тәулікке дейін карантин бөлімшесіне орналастырылады.

Күдіктілерді, айыпталушылар және сотталушыларды камераларға жедел қызмет қызметкерінің келісімі бойынша, ал кәмелетке толмағандарды тәрбие жұмысы жөніндегі инспекторының келісімі бойынша кезекші көмекші немесе оның орынбасары орналастырады. Науқас адамдар медицина қызметкерінің нұсқауымен орналастырылады. Жұқпалы ауруы бар адамдар жеке камераларға орналастырылады. Карантинде ұстау мерзімі медициналық көрсетілімдер бойынша белгіленеді.

Заңның 32-бабында көзделген жағдайларды қоспағанда, бұл ретте бейнебақылау жүйесі арқылы және қосымша (уақытша) бекет қою арқылы күшейтілген қадағалау қамтамасыз етіле отырып, суицид жасау қаупі бар адамдарды жалғыз ұстауға жол берілмейді.

17. Жұқпалы аурумен ауыратын немесе ерекше медициналық күтімге және байқауға мұқтаж науқастар басқа күдіктілерден, айыпталушылар және сотталушылардан бөлек орналастырылады.

18. Тергеу изоляторларында орналасқан медициналық ұйымдарда күдіктілер, айыпталушылар және сотталушылар ауру түрлеріне қарай орналастырылады. Ерлер мен әйелдер, ересектер мен кәмелетке толмағандар бір-бірінен бөлек орналастырылады. Аса ауыр және ауыр қылмыстар жасады деген күдіктілер, айыпталушылар және сотталушылар оқшау ұсталады.

19. Кәмелетке толмағандар жасын, денесінің жетілуін және мінез-құлқын ескере отырып, жеке корпустарда, секцияларда немесе режимдік корпустардың қабаттарында орналасқан аз орындық камераларда кем дегенде 4-6 адамнан орналастырылады.

20. Камераларда құқық бұзушылықтардың алдын алу үшін Заңның 32-бабына сәйкес кәмелетке толмағандармен бірге алғаш рет қылмыстық жауапкершілікке тартылған оң мінезделетін ересек адамдар орналастырылады.

Аз орындық камераларда кәмелетке толмағандармен бірге ересектердің бір-екеуін, жалпы камераларда үшеуін ұстауға жол беріледі.

21. Күдіктілер, айыпталушылар және сотталушылар осы Қағидаларға 4-қосымшаға сәйкес жабдықталған құлыппен жабылатын жалпы камераларда ұсталады. Заңның 31-бабына сәйкес тергеу изоляторы бастығының дәлелді қаулысы бойынша жалғыз басты камераларға күдіктілер, айыпталушылар және сотталушыларды орналастыруға рұқсат етіледі.

22. Осы Қағидалардың 16-тармағында көрсетілген оқшаулау тәртібі күдіктілердің, айыпталушылардың және сотталушылардың барлық орын ауыстыруы (серуендеу, санитариялық тазалау жүргізу кезінде дәлізде және тергеу изоляторының аумағында қозғалуы) кезінде қамтамасыз етіледі.

23. Жүкті әйелдерді, үш жасқа дейінгі баласы бар әйелдерді орналастыру үшін жеке режимдік корпустарда немесе режимдік корпустардың оқшауланған бөліктерінде орналасқан неғұрлым жарық және құрғақ камералар пайдаланылады. Камералар бір қабатты жатын орындарымен жабдықталады.

3-тарау. Күдіктілерді, айыпталушыларды және сотталушыларды жеке тінту, дактилоскопиялау, суретке түсіру және заттарын тексеріп қарау тәртібі

24. Тергеу изоляторына түскен күдіктілер, айыпталушылар және сотталушылар толық жеке тінтуден, дактилоскопиялаудан және суретке түсіруден өтеді, ал олардың жеке заттары тексеріп қаралады.

25. Күдіктілерді, айыпталушыларды және сотталушыларды жеке тінту және олардың заттарын тексеріп қарау сақтауға және пайдалануға тыйым салынған не осы адамға тиесілі емес заттарды, құралдарды және азық-түлікті табу және алып қою мақсатында жүргізіледі.

26. Күдіктілерге, айыпталушыларға және сотталушыларға сақтауға және пайдалануға тыйым салынған заттарға өмір мен денсаулыққа қауіп төндіретін немесе қылмыс қаруы ретінде пайдаланылатын не күзетпен ұстауға кедергі келтіре алатын заттар, заттектер және тамақ өнімдері, сондай-ақ осы Қағидаларға 6-қосымшаға сәйкес күдіктілер, айыпталушылар және сотталушылардың өздерінде болуға, сақтауға, сәлемдемелер, сәлем-сауқаттар арқылы және қолма-қол төлемсіз сатып алуға рұқсат етілген тамақ өнімдері, бірінші кезекте қажетті заттар, аяқ киім, киім-кешек және басқа да өнеркәсіптік тауарлардың тізбесіне (бұдан әрі – Рұқсат етілген заттар тізбесі) енгізілмеген немесе белгіленген мөлшерден асып кеткен тамақ өнімдері, бірінші кезекте қажетті заттар, аяқ киімдер, киім-кешек және басқа да өнеркәсіптік тауарлар жатады.

27. Жеке тінту толық және жартылай болады. Күдіктілер, айыпталушылар және сотталушылар:

- 1) тергеу изоляторына келген кезде;
- 2) изолятордан тыс жерлерге кеткенде;

3) жалғыз адамдық камераға, тәртіптік изоляторға немесе уақытша оқшаулау үй-жайына отырғызу кезінде, сондай-ақ Заңның 33-бабына сәйкес тергеу изоляторы бастығының немесе орынбасарының нұсқауымен басқа да жағдайларда толық тінтілуге жатады.

Толық тінту кезінде тінтілушінің денесі, оның киімдері, аяқ киімдері, сондай-ақ протезі мұқият тексеріледі. Күдіктілер, айыпталушылар және сотталушыларға толық

шешініп, денесінің тиісті жерін көрсету ұсынылады. Пластырлы жапсырмалар, гипс және басқа да байлауыштар медицина қызметкерімен бірлесіп тексеріледі. Киімге тігілген заттар табылған жағдайда матасы сөгіледі. Аяқ киімнен супинаторлар, темір тағалар суырылып алынады.

Күдіктілер, айыпталушылар және сотталушыларға тек Рұқсат етілген заттар тізбесінде белгіленген өздерінде болуға және камерада сақтауға рұқсат етілген заттар, құралдар және тамақ өнімдері қалдырылады. Күдіктілерде, айыпталушыларда және сотталушыларда қалған олардың жеке заттары мен құралдары камера карточкаларына жазылады. Рұқсат етілген заттар тізбесіне кірмейтін заттар сақтауға қабылданады не акт жасаумен (еркін нысанда) тергеу изоляторы бастығының шешімімен жойылады.

28. Жартылай тінту күдіктілер, айыпталушылар және сотталушылардың тергеу изоляторының шегінде алып шыққан кезде (дактилоскопиялауға, дәрігерге, тергеушіге алып шыққанда, туыстарымен және өзге де адамдармен кездескенге дейін және кейін, басқа камераға, оның ішінде жалғыз адамдық камераға ауыстыру кезінде) жүргізіледі. Жартылай тінту кезінде тінтілушіні шешіндірмей-ақ, киімі және аяқ киімі қаралады және тінтіледі.

29. Күдіктілер, айыпталушыларды және сотталушыларды жеке тінтуді тергеу изоляторының онымен жынысы бір қызметкері жүргізеді.

30. Тергеу изоляторына келген күдіктілер, айыпталушылар және сотталушыларды олардың жеке істерінде тану суреті және дактилоскопиялық картасы болмаған кезде фотодактилоскопия тобының қызметкері суретке түсіреді және дактилоскопиялайды. Олардың әрқайсысына бір дактилоскопиялық карта және көлемі 4,5х6, 6х9 сантиметр алты фотокарта (үшеуі алдынан және үшеуі қырынан) дайындалады.

31. Күдіктілер, айыпталушылар және сотталушылардың заттарын тексеру тергеу изоляторына түскен кезде, оның шегінен тыс жерге жөнелтілер алдында, басқа камераға, тергеу изоляторында орналасқан медициналық ұйымның стационарына ауыстыру немесе тәртіптік изоляторға немесе уақытша оқшаулау үй-жайына қамау кезінде олардың қатысуымен жүргізіледі.

32. Күдіктілер, айыпталушылар және сотталушыларды толық тінту немесе заттарын тексеру хаттамамен ресімделеді (еркін нысанда), оған еркін нысанда жасалған тыйым салынған заттарды, заттектерді және тамақ өнімдерін алып қою туралы акті қоса беріледі. Толық тінту мен заттарды тексеру қатар жүргізілген кезде бір хаттама жасалады. Хаттамаға күдікті, айыпталушы немесе сотталушы және тергеу изоляторының толық тінту жүргізген немесе заттарын тексерген қызметкері қолдарын қояды. Күдіктінің, айыпталушының немесе сотталушының хаттамаға қол қоюдан бас тартуы және оның тінту немесе заттарын тексеру кезіндегі наразылықтары хаттамада жазылады. Хаттама мен алып қою туралы акті жеке іске тігіледі. Толық жеке тінту

немесе заттарды тексеру туралы күдіктінің, айыпталушының немесе сотталушының камералық карточкасында тінту жүргізген немесе заттарын тексерген адамның тегін және күнін көрсете отырып белгі қойылады.

33. Жартылай тінту кезінде сақтауға және пайдалануға тыйым салынған заттарды, заттектерді мен тамақ өнімдерін алу туралы баянат (еркін нысанда) жасалады.

34. Күдіктілер, айыпталушылар және сотталушыларды тінту немесе заттарын тексеру кезінде тыйым салынған заттарды, заттектерді мен тамақ өнімдерін табуға арналған техникалық құралдарды пайдалануға рұқсат етіледі.

4-тарау. Күдіктілер, айыпталушылар немесе сотталушылардан сақтауға және пайдалануға тыйым салынған заттарды, заттектерді және тамақ өнімдерін алып қою тәртібі

35. Күдіктіден, айыпталушыдан немесе сотталушыдан сақтауға қабылданған тиесілі ақшасы оның жеке шотына салынады. Құнды заттар (қымбат металдар және одан жасалған бұйымдар, қымбат тастар, інжу және одан жасалған бұйымдар, барлық түрдегі және маркадағы сағаттар, бағалы қағаздар, валюта және ұялы байланыс құралдары) тергеу изоляторының қаржы бөліміне тергеу изоляторында болған уақытта оларды пайдалану және иемдену құқығынсыз сақтауға тапсырылады. Жеке құжаттар (жеке басын куәландыратын және басқа құжаттар) тергеу изоляторының арнайы есепке алу бөліміне сақтауға беріледі. Сақтауға және пайдалануға тыйым салынған заттар, құралдар мен тамақ өнімдері мекеменің қоймасына сақтауға тапсырылады немесе соттың шешімімен жойылады.

36. Күдіктілер, айыпталушылардан немесе сотталушылардан құндылықтарды алып қою не сақтауға қабылдау нәтижелері бойынша осы Қағидаларға 7-қосымшаға сәйкес нысан бойынша үш данада акті толтырылады. Бірінші данасы күдіктіге, айыпталушыға немесе сотталушыға беріледі, екінші данасы қаржы бөліміне беріледі, ал үшінші данасы жеке істе сақталады. Ақша жеке шотқа түскеннен кейін күдіктіге, айыпталушыға немесе сотталушыға қаржы бөлімі шоттағы сақталатын сома көрсетілген түбіртек береді.

37. Күдіктілер, айыпталушылардан немесе сотталушылардан сақтауға қабылданған не алып қойылған ақшаның сомасы немесе құнды заттары туралы тергеу изоляторының әкімшілігі олардың сұрау салуы бойынша өндірісінде қылмыстық іс бар адамға немесе органға хабарлайды.

38. Күдіктіден, айыпталушыдан немесе сотталушыдан заттарды және тамақ өнімдерін сақтауға қабылдау комиссиялық түрде жүргізіледі. Комиссиялардың құрамын тергеу изоляторының бастығы режим және күзет бөлімінің қызметкерлері, тергеу изоляторында орналасқан медициналық ұйымның медицина қызметкері қатарынан акт бойынша тағайындайды.

39. Соттың шешімі бойынша құндылығы жоқ нәрселер, заттар, сондай-ақ тамақ өнімдері, оның ішінде: спирттік ішімдіктер немесе спирттік негіздегі бұйымдар,

оларды дайындауға арналған өнімдер, есірткі (оларды тарату фактісі бойынша сотқа дейінгі тереп-тексеру жағдайларын қоспағанда) және оларды пайдалануға арналған құрылғылар, отқа қауіпті заттар мен құралдар, тергеу изоляторында орналасқан медициналық ұйым медицина қызметкерінің қорытындысы бойынша мақсаты бойынша пайдалануға жарамсыз деп танылған дәрілік заттар, ойын карталары, эротикалық, порнографиялық немесе зорлық-зомбылыққа табынуды насихаттайтын қолжазба, графикалық, баспа, фото және бейне өнімдер (қылмыстық іс материалдарын қоспағанда), тұтынылуы адамдардың өмірі мен денсаулығына қауіп төндіретін не тергеу изоляторларында қамтамасыз етілмейтін ерекше сақтау жағдайларын талап ететін тамақ өнімдері, мақсаты немесе қасиеттерін анықтау мүмкін емес не өзінің бастапқы тұтыну қасиеттерін жоғалтқан және Рұқсат етілген заттардың тізбесіне енген өзге де заттар, заттектер мен тамақ өнімдері жойылуға жатады.

40. Күзетте ұсталу кезінде күдікті, айыпталушыдан немесе сотталушыдан алынған немесе айқындалған ақша немесе құнды заттардың әрбір фактісі бойынша, сондай-ақ өзге де қажетті жағдайларда олардың қайдан келіп түскенін және нақты иесін анықтау мәніне қызметтік тергеу жүргізіледі.

41. Күдіктілерден, айыпталушылардан немесе сотталушылардан, сондай-ақ камералар мен мекеме аумағына тиесілі ақша, бағалы қағаздар мен басқада құнды заттар, иелерін анықтауға мүмкіндік болмаған жағдайда, осы Қағидаларға сәйкес әкімшілікпен алынады және сот шешімі бойынша мемлекет кірісіне аударуға жатады.

Рұқсат етілген заттардың тізбесіне кірмейтін заттар, бұйымдар, заттектер, құжаттар мен азық-түліктер күдіктілерден, айыпталушылардан немесе сотталушылардан алынған , мекеме әкімшілігінің комиссия шешімі бойынша туыстарына беріледі немесе мекеме бастығының қаулысымен сақтауға тапсырылады немесе жойылады, осы туралы (еркін нысанда) акт жасалады.

42. Күдіктінің, айыпталушының немесе сотталушының өтініші бойынша және өндірісінде қылмыстық іс бар адамның не органның келісімімен тергеу изоляторында сақталудағы заттар, заттектер және тамақ өнімдері күдікті, айыпталушы немесе сотталушының туыстарына немесе өзге адамдарға (еркін нысандағы) қолхатпен беріледі және күдіктінің, айыпталушының немесе сотталушының жеке ісіне қосылады.

43. Күдікті, айыпталушы немесе сотталушы қайтыс болған жағдайда сақтаудағы оған тиесілі ақша, құнды заттар, басқа да заттар, заттектер мен тамақ өнімдері Қазақстан Республикасының Азаматтық кодексінің 235-бабында көрсетілген тәртіпте оның мұрагерлеріне беріледі.

5-тарау. Күдіктілер, айыпталушылар және сотталушыларды материалдық-тұрмыстық қамтамасыз ету

44. Күдіктілер, айыпталушылар және сотталушыларды материалдық-тұрмыстық қамтамасыз ету Заңның 22-бабына сәйкес жүзеге асырылады.

Күзетте ұстау кезінде уақытша пайдалануға тегін мүлік беріледі.

Жатын үй-жайлар санитариялық талаптарға сай болуы тиіс (үй-жай ауданы, көзге қауіпсіз жарықтандыру, табиғи жарықтандыруда әдебиеттерді оқу мүмкіндігі, үй-жайды желдету).

Кереуетті жинау үлгісі осы Қағидаларға 8-қосымшада белгіленген.

Күн тәртібімен ұйықтауға бөлінбеген уақытта жатын орындарын пайдалануға жол берілмейді.

45. Жалпы пайдалану үшін камераларға Қазақстан Республикасы Бюджет кодексінің 70-бабының 3-тармағына сәйкес бекітілген Қылмыстық-атқару жүйесі мекемелерінде ұсталатын күдіктілерді, айыпталушыларды және сотталғандарды тамақтандыру және материалдық-тұрмыстық қамтамасыз етудің заттай нормаларына сәйкес жеке гигиена құралдары беріледі.

46. Тергеу изоляторларының камералары:

1) үстелмен және орындықтармен және камерадағы орындар саны бойынша отырғызу орындарымен;

2) жатын орынмен;

3) санитариялық тораппен;

4) су құбыры кранымен;

5) электр құралдарын қосуға арналған розеткалармен;

6) азық-түлік шкафымен;

7) сыртқы киімге арналған ілгішпен;

8) жуыну жабдықтарына арналған сөремен;

9) қабырғаға бекітілетін айнамен;

10) ауыз суға арналған ыдыспен;

11) отандық радиобағдарламаларды таратуға арналған радиодинамикпен;

12) әкімшілік өкілін шұғыл шақыртатын батырмамен;

13) қоқысқа арналған ыдыспен;

14) күндізгі және түнгі жарық беретін шамдармен;

15) тізбесі осы Қағидаларға 9-қосымшада көрсетілген қосымша ақылы қызмет көрсетілген жағдайда желдеткіш жабдығымен, сондай-ақ тұрмыстық құралдармен;

16) баласы бар әйелдер ұсталатын камераларда балалар кереуеттерімен жабдықталады.

47. Камераларда су ысытатын құралдар болмағанда ішуге арналған қайнаған су күнделікті тергеу изоляторының әкімшілігі белгіленген уақытта қажеттілікті ескере отырып беріледі.

48. Күдіктілер, айыпталушылар және сотталушыларға аптасына кемінде бір рет 15 минуттан кем емес ұзақтықта душта жуыну мүмкіндігі беріледі. Апта сайын душта шомылғаннан кейін төсек жабдықтары ауыстырылады.

Біржолғы қауіпсіз ұстаралар бекітілген кестеге сәйкес пайдалану уақытына тергеу изоляторы әкімшілігінің бақылауымен беріледі. Басқа уақытта бекетте жабдықталған арнайы металл жәшікте сақталады.

49. Үстел ойындары он адамға немесе бір камераға бір жиынтықтан беріледі.

50. Күдіктілер, айыпталушылар және сотталушылардың өтініші бойынша ұсыныс, өтініш, шағым жазу үшін жазу құралдары (қағаз, шарикті қаламсап) беріледі.

51. Тергеу изоляторының кітапханасынан газеттер олардың келіп түсуіне қарай он адамға немесе бір камераға есебінен бір газеттен беріледі.

52. Тергеу изоляторының кітапханасынан кітап және журнал айырбастау аптасына бір рет жүргізіледі.

6-тарау. Күдіктілер, айыпталушылар және сотталушылардың тамақ өнімдерін, сондай-ақ бірінші кезекте қажетті заттар мен басқа да өнеркәсіптік тауарларды сатып алу тәртібі

53. Күдіктілер, айыпталушылар және сотталушылар тамақ өнімдерін, бірінші кезекте қажетті заттарды және сақтауға және пайдалануға тыйым салынбаған басқа да өнеркәсіп тауарларын қолма-қол ақшасыз есеп айырысу бойынша тергеу изоляторының дүкенінен (дүңгіршегінен) немесе электрондық сауда алаңынан сатып алады.

Электрондық сауда алаңында тамақ өнімдерін, бірінші кезекте қажетті тауарларды сатып алу тапсырыс беру арқылы, арнайы стационарлық (терминал) не мобильді (планшет) құрылғы арқылы, Интернетке электрондық сауда алаңының интернет-ресурсына бару үшін ғана қол жеткізе отырып жүзеге асырылады.

54. Тергеу изоляторының дүкенінде (дүңгіршегінде) немесе электрондық сауда алаңында сатуға рұқсат етілген тамақ өнімдерінің, бірінші кезекте қажетті заттардың және басқа да өнеркәсіп тауарларының ассортименті Рұқсат етілген заттар тізбесімен айқындалады.

55. Бір адамға тамақ өнімдерін және өзге де тауарларды сатудың нормасы ассортименті, саны бойынша белгіленбейді. Күдікті, айыпталушы немесе сотталушының өзінде болатын тамақ өнімдерінің жалпы салмағы 35 килограммнан аспауы керек. Сатып алынған тауарды сату айына екі реттен кем жүргізмейді.

56. Күдіктілер, айыпталушылар және сотталушылар дүкенге (дүңгіршекке) шығарылмайды. Дүкендегі (дүңгіршектегі) бар тауарлардың ассортименті және олардың құны күзетпен ұсталатын адамдардың назарына жеткізіледі.

57. Тамақ өнімдерін, бірінші кезекте қажетті заттарды және өнеркәсіптік тауарларды сатып алғысы келетін адамдар тергеу изоляторы бастығының атына осы Қағидаларға 10-қосымшаға сәйкес нысан бойынша өтініш жазады, ол жеке шотында ақшасы бар екендігі туралы ақша түбіртегімен бірге әкімшілік өкіліне тапсырылады.

Дүкеннің (дүңгіршектің) жұмыскері тауар сатып алғысы келген күдікті, айыпталушы және сотталушының жеке шотында ақшасының бар-жоғын қаржы

бөлімінен тексереді. Сатып алынған тауарлар камераларға таратылып, қолхат арқылы беріледі.

58. Егер тауар сатып алған күдікті, айыпталушы және сотталушының жеке шотында ақша қалса, оған тиісті белгі қойылған түбіртек қайтарылады, ал егер қаражат болмаса түбіртек өтінішке тіркеледі. Жұмыс күні аяқталған соң дүкен (дүңгіршек) жұмыскері аванстық есеп жасайды және оны өтініштермен бірге жеке шоттағы ақшаны есептен шығару үшін қаржы бөліміне тапсырады.

59. Тергеу изоляторында дүкен (дүңгіршек) болмаған жағдайда күдіктілер, айыпталушылар және сотталушыларға қажетті тауарларды тергеу изоляторынан тыс жерде орналасқан сауда нүктесінен сатып алынады.

Күдіктілер, айыпталушылар және сотталушылардың жеке шоттарынан талап еткен ақша сомасын есепке алу үшін күдіктілер, айыпталушылар және сотталушылардан тергеу изоляторының қаржы бөлімінің қызметкеріне тергеу изоляторының бастығы куәландырылған сенімхатты береді. Берілген ақша есеп беретін адамнан осы туралы өтініш берген адамдарға сатып алынған тамақ өнімдерін және бірінші кезекте қажетті заттарды бергенін растайтын аванстық есеп және құжаттар негізінде есептен шығарылады. Тамақ өнімдерін және бірінші кезекте қажетті заттарды алуға өтініштің және қолхаттың негізінде олардың құны күдіктілер, айыпталушылар және сотталушылардың жеке шоттарынан есептен шығарылады.

Тергеу изоляторының әкімшілігі күдіктілер, айыпталушылар және сотталушылардың тамақ өнімдерін және бірінші кезекте қажетті заттарды сатып алуға жұмсаған ақша сомасы (күні көрсетіле отырып) туралы оның жеке ісінде белгі жасайды.

60. Күдіктілер, айыпталушылар және сотталушылардың туыстарына не өзге адамдарға тергеу изоляторының қаржы бөлімі арқылы тергеу изоляторының дүкендерінде (дүңгіршектерде) немесе электрондық сауда алаңында сатуда бар тамақ өнімдерінің, бірінші кезекте қажетті заттардың және басқа да өнеркәсіптік тауарлардың құнын кейін оны күдіктілерге, айыпталушыларға және сотталушыларға беру үшін төлеу мүмкіндігі беріледі.

Бұл жағдайда туысы немесе өзге адам тергеу изоляторының қаржы бөліміне екі данада өтініш береді, онда өзі құнын төлегісі келетін тамақ өнімдерінің және басқа да тауарлардың саны мен салмағы көрсетіледі және қажетті соманы төлейді. Сатып алынған тауарды күзетпен ұстауға алынған адам алғаннан кейін оның қолы қойылған өтініштің бірінші данасы тауардың құнын төлеген адамға қайтарылады, ал екінші данасы жеке ісіне тігіледі. Тиісті белгі анықтама картотекасына қойылады.

7-тарау. Сәлемдемелерді, сәлем-сауқаттарды күдіктілер, айыпталушылар және сотталушыларға қабылдау және беру тәртібі

61. Күдіктілерге, айыпталушыларға және сотталушыларға арналған сәлемдемелерді, сәлем-сауқаттарды қабылдау тергеу изоляторының осы Қағидаларға 11-қосымшаға сәйкес сәлем-сауқаттарды қабылдау бөлмесінің жиһазы мен мүккәмалы тізбесіне сәйкес жабдықталған үй-жайында жүзеге асырылады. Күдіктілерге, айыпталушыларға және сотталушыларға салмағы 20 килограммнан аспайтын сәлемдемелер мен сәлем-сауқаттардың санын шектеусіз алуға рұқсат етіледі. Сәлем-сауқаттар келушілердің кезектілік тәртібінде қабылданады. Тізбе мемлекеттік және орыс тілдерінде сәлем-сауқаттар қабылдауға арналған үй-жайда ілінеді.

62. Сәлем-сауқаттарды жеткізген адам осы Қағидаларға 12-қосымшаға сәйкес нысан бойынша екі данада өтініш толтырады және оған қол қояды. Өтініштің екі данасы, сәлем-сауқат, сәлем-сауқатты жеткізген адамның жеке басын куәландыратын құжат тергеу изоляторының қызметкеріне беріледі.

63. Сәлем-сауқаттың ішіндегісінің болуын, салмағын салыстыру және тексеру оларды жеткізген адамдардың қатысуымен осы Қағидаларға 13-қосымшаға сәйкес азық-түлік және заттай сәлем-сауқаттар мен сәлемдемелерді тексеру тәртібіне сәйкес жүзеге асырылады. Салынғанның тізбесі және сәлемдемелер мен сәлем-сауқаттардың салмағы тексеріледі және өтініште белгіленеді. Жеке басын куәландыратын құжат, сәлем-сауқаттардың ішіндегісін салыстыру не тексеру жүргізгеннен кейін қайтарылып беріледі.

64. Тергеу изоляторының қызметкері сәлем-сауқатты қабылдаған соң келушіге жеке құжаттарын және өтініштің бірінші данасын қабылдағаны туралы қол қойып қайтарады, ал екінші данасы сәлем-сауқатты алғаны туралы оның қолы қойылғаннан кейін күдіктінің, айыпталушының немесе сотталушының жеке ісіне тігіледі. Анықтама карточкасында бұл адамға сәлем-сауқатты қабылдағаны туралы белгі қойылады. Күдікті, айыпталушы немесе сотталушы өтінішке қол қоюдан бас тартқан жағдайда бұл туралы өтініште тиісті белгі қойылады.

65. Сәлем-сауқаттар мынадай жағдайларда:

1) адресат күзетпен ұстаудан босатылған немесе ол тергеу изоляторынан үш тәуліктен артық мерзімге кеткен;

2) күдікті, айыпталушы немесе сотталушының қайтыс болған;

3) күдіктінің, айыпталушының немесе сотталушының өзіне арналған сәлем-сауқатты өз қолымен алуына немесе ішіндегіні керегіне жаратуға мүмкіндігі болмаған;

4) сәлем-сауқаттың салмағы осы Қағидалардың 61-тармағында көзделген нормаға сәйкес келмеген;

5) сәлем-сауқатты жеткізген адам жеке басын куәландыратын құжатты көрсетпеген;

6) күдікті, айыпталушы немесе сотталушының өзіне арналған сәлем-сауқатты қабылдаудан жазбаша түрде бас тартқан жағдайларда;

7) транзитпен айдауылданатын адамдарға қабылданбайды және келушіге кері қайтарылады.

66. Тергеу изоляторында немесе ауруханада емделу курсынан өтіп жатқан адамдарға келген сәлем-сауқаттарды қабылдау кезінде емдеуші дәрігердің ұсынымдары ескеріледі.

67. Сәлемдемелерді ашып және ішіндегісін салыстырғаннан кейін екі данада тізімдеме жасалады, онда: заттар мен азық-түліктің атауы және тізбесі, олардың сыртқы белгілері, сапасы, ішіндегіден нақты не алынғаны және сақтауға тапсырылғаны көрсетіледі. Сақтауға рұқсат етілген заттар, заттектер және тамақ өнімдері күдіктіге, айыпталушыға немесе сотталушыға тізімдемеге қол қою арқылы беріледі, оның бірінші данасы жеке іске, ал екінші данасы номенклатуралық іске тігіледі.

68. Сәлем-сауқаттарда табылған күдіктілер, айыпталушылар немесе сотталушылардың сақтауына және пайдалануына тыйым салынған тамақ өнімдері сәлем-сауқатты жеткізген адамға қайтару себебін көрсете отырып қайтарылады. Сәлемдемелер мен сәлем-сауқаттарда табылған ақша және бағалы заттарды тергеу изоляторының әкімшілігі алып қояды және сот шешімі бойынша мемлекет кірісіне айналдыруға жатады.

69. Осы Қағидалардың 65-тармағында көрсетілген жағдайларда сәлемдемелер жөнелтушілерге қайтарылады. Сәлемдемелер пошта арқылы үстеме төлеммен "кері қайтаруға жатады" деген белгімен қайтарылады.

70. Тәртіптік изоляторға немесе уақытша оқшаулау үй-жайына қамалған адамдардың атына келіп түскен сәлемдемелер мен сәлем-сауқаттар қоймаға сақтауға тапсырылады және күдіктілер, айыпталушылар және сотталушыларға олардың тәртіптік изолятордан немесе уақытша оқшаулау үй-жайында болу мерзімі аяқталғаннан кейін беріледі.

71. Тергеу изоляторының әкімшілігі сәлемдемелер мен сәлем-сауқаттар ішіндегісінің сақталуын қамтамасыз етеді, бірақ ұзақ уақыт сақталуына байланысты табиғи бұзылуына, сондай-ақ тексеру нәтижесінде тауарлық бейнесінің жоғалуына жауап бермейді.

72. Сәлемдемені немесе сәлем-сауқатты қабылдағаннан кейін күдіктіге, айыпталушыға немесе сотталушыларға бір тәуліктен кешіктірілмей, ал күдікті, айыпталушы немесе сотталушы уақытша болмаған не жалғыз адамдық камераға, тәртіптік изоляторға немесе уақытша оқшаулау үй-жайына қамалған жағдайда, ол қайтып оралғаннан кейін не жазалау шарасын өтеу аяқталғаннан кейін беріледі.

8-тарау. Күдіктілер, айыпталушылар және сотталушыларға жеделхаттарды, хаттарды, ақпалай аударымдарды алу және жіберу тәртібі

73. Күдіктілер, айыпталушылар және сотталушылар туыстарынан және өзге де адамдардан жеделхаттар мен хаттар алады және жібереді.

74. Күдіктілер, айыпталушылар және сотталушылардың хат алмасуы тек тергеу изоляторының әкімшілігі арқылы ғана олардың өз есебінен, өндірісінде қылмыстық іс бар адамның немесе органның рұқсаты бойынша жүзеге асырылады және прокурор мен сотқа арналған хаттарды қоспағанда басқалары цензураға жатады.

75. Күдіктілер, айыпталушылар және сотталушылар пошта қажеттіліктерін (конверттер, маркалар) тергеу изоляторының дүкенінен (дүңгіршегінен) немесе электрондық сауда алаңынан сатып алады.

76. Күдіктілер, айыпталушылар және сотталушылардың жеделхаттарын және хаттарын күн сайын әкімшілік өкілімен, жөнелтушінің тегі, аты-жөні және тергеу изоляторының пошта мекенжайы көрсетіле отырып қабылданады.

77. Күдіктілер, айыпталушылар және сотталушылардан жеделхатты немесе хатты қабылдаған сәттен бастап және оларды жібергенге дейін, сондай-ақ тергеу изоляторына жеделхат немесе хат келіп түскен сәттен бастап және оларды адресатқа тапсырғанға дейін көрсетілген мекеменің әкімшілігі олардың сақталуын, хат алмасудағы құпияны қамтамасыз етеді.

78. Күдікті, айыпталушы және сотталушының атына келіп түскен жеделхаттарды немесе хаттарды тапсыруды, сондай-ақ оларды адресаттарға жіберуді тергеу изоляторының әкімшілігі олардың келіп түскен немесе оны күдіктіге, айыпталушыға және сотталушыға тапсырған күнінен бастап үш жұмыс күнінен кешіктірмей жүргізеді. Жеделхатты немесе хатты мемлекеттік немесе орыс тіліне аудару қажет болған кезде олардың тапсыру мерзімі аударма жасау үшін бір айға дейін ұзартылады.

79. Күдікті, айыпталушы және сотталушыға жақын туысының өлімі немесе ауыр сырқаттануы туралы мәлімет оны алғаннан кейін дереу хабарланады.

80. Жәбірленушілерге, куәгерлерге арналған, сондай-ақ ішінде қылмыстық іс бойынша мәліметтер, қорлау, қорқыту, кек алуға, қылмыс немесе өзге де құқық бұзушылық жасауға шақыру, тергеу изоляторының күзеті, оның қызметкерлері туралы ақпарат, тыйым салынған заттарды беру тәсілдері және қылмыстық іс бойынша ақиқатты анықтауға кедергі болатын немесе қылмыс жасауға ықпал ететін басқа да мәліметтер бар, сондай-ақ құпия жазбамен, мемлекеттік немесе өзге де заңмен қорғалатын құпиялар шифрленіп жазылған жеделхаттар немесе хаттар адресатқа жіберілмейді, күдіктілерге, айыпталушыларға және сотталушыларға берілмейді және өндірісінде қылмыстық іс бар адамға немесе органға беріледі.

81. Күдіктілер, айыпталушылар және сотталушылардың ақшасы тергеу изоляторының мекен-жайына пошта арқылы аударылады және олардың жеке шоттарына, сондай-ақ электрондық сауда алаңының сервисіндегі жеке шотын (логинін) толықтыру арқылы аударылады. Күдіктінің, айыпталушының және сотталушының жеке шотындағы ақша сомасын пошта арқылы аудару үшін ол тергеу изоляторы

бастығының атына дәлелді өтініш жазады. Ақша аудару күдіктінің, айыпталушының немесе сотталушының жеке шотындағы қаражат есебінен пошта арқылы жүзеге асырылады.

Туыстары мен өзге де адамдарға электрондық сауда алаңы сервисінің көмегімен күдіктілер, айыпталушылар және сотталушылардың жеке шоттарын (логинін) толықтыруға, сондай-ақ электрондық сауда алаңында тапсырысты жүзеге асыруға және күдіктілер, айыпталушылар және сотталушыларға сәлемдеме түрінде жіберуге жол беріледі.

9-тарау. Күдіктілер, айыпталушылар және сотталушылардың ұсыныстар, өтініш және шағымдар жолдау тәртібі

82. Әкімшілік өкілдері күн сайын камераларды аралайды және күдіктілерден, айыпталушылардан және сотталушылардан жазбаша және ауызша түрде ұсыныстар, өтініштер және шағымдар қабылдайды. Ұсыныстарға, өтініштерге және шағымдарға берілген жауаптар күдіктілер, айыпталушыларға және сотталушыларға қолхат арқылы жарияланады және жеке ісіне тіркеледі.

83. Ауызша түрде қабылданған ұсыныстар, өтініштер және шағымдар оларды шешуге жауапты адамға баяндалады.

84. Тергеу изоляторының әкімшілігіне арналған жазбаша ұсыныстар, өтініштер және шағымдар тіркеледі және оларды шешу бойынша шаралар қабылдайтын тергеу изоляторының бастығына баяндалады. Мұндай мүмкіндік болмаған жағдайда күдіктіге, айыпталушыға немесе сотталушыға тиісті түсіндірме беріледі.

85. Прокурорға немесе сотқа жолданған ұсыныстар, өтініштер және шағымдар желімделген конвертте қабылданады және цензураға жатпайды. Келіп түсуіне қарай дереу адресатқа жолданады.

86. Мемлекеттік органдарға жолданған ұсыныстарды, өтініштерді және шағымдарды тергеу изоляторының әкімшілігі қарап, оны берген сәттен бастап бір тәуліктен кешіктірмей тиесілігі бойынша жолдауы тиіс.

87. Апелляциялық және кассациялық шағымдарды қоспағанда, ұсыныстарды, өтініштерді және шағымдарды жіберу бойынша шығыстарды төлеу жөнелтушінің есебінен жүргізіледі. Күдіктінің, айыпталушының немесе сотталушының жеке шотында ақшасы болмаған кезде шығыс тергеу изоляторының есебінен жүргізіледі.

10-тарау. Күдіктілер, айыпталушылар және сотталушылардың діни жораларды жасау тәртібі

88. Күдіктілер, айыпталушылар және сотталушылар діни жораларды камераларда, өзінің жатын орнының жанында осы Қағидаларда көрсетілген жағдайларды сақтай отырып орындайды. Мұндай мақсаттар үшін үй-жай бөлінбейді.

89. Күдіктілер, айыпталушылар және сотталушылардың діни жораларды жасауы мекеменің жұмыс істеуіне кедергі келтірмеуі, ішкі тәртіптемені бұзбауы, сондай-ақ Заңның 16-бабы 1-тармағының 14) тармақшасына сәйкес басқа күдіктілер, айыпталушылар және сотталушылардың құқықтарын шектемеуі тиіс.

90. Күдіктілер, айыпталушылар және сотталушыларға діни әдебиетті ұстауға және қолдануға рұқсат етіледі.

11-тарау. Күдіктілерді, айыпталушыларды және сотталушыларды еңбекке тарту тәртібі

91. Еңбек етуге ниет білдірген күдіктілердің, айыпталушылардың және сотталушылардың еңбегі тек тергеу изоляторларының аумағында камераларда, өндірістік алаңдарда, шеберханаларда және жөндеу-құрылыс жұмыстарында ұйымдастырылады. Жұмыс жүргізу кезінде оқшаулаудың белгіленген талаптарын және Заңның 31, 32-баптарында белгіленген күдіктілерді, айыпталушыларды және сотталушыларды бөлек орналастыру қағидаларын орындау қамтамасыз етіледі.

92. Күдіктілер, айыпталушылар және сотталушылар тергеу изоляторының арнайы есепке алу бөлімдеріндегі, фотозертханалардағы, радиотарату желілеріндегі жұмыстарға, сондай-ақ күзеттің инженерлік-техникалық, сигнализация және байланыс құралдарын, көлік құралдарының барлық түрлерін және көбейтетін аппаратураны жөндеумен және пайдаланумен байланысты жұмысқа жіберілмейді.

93. Еңбек етуге ниет білдірген күдіктілер, айыпталушылар және сотталушылар тергеу изоляторы бастығының атына (еркін нысанда) өтініш жазады, ол оны үш жұмыс күні ішінде қарайды және тиісті шешім қабылдайды. Күдіктіні, айыпталушыны және сотталушыны мекемеде жұмысқа орналастыру мүмкіндігі болмаған кезде, оған тиісті түсіндірме беріледі.

12-тарау. Күдіктілер, айыпталушылар және сотталушылардың отбасылық-құқықтық қатынастарға және азаматтық-құқықтық мәмілелерге қатысу тәртібі

94. Күдіктілердің, айыпталушылардың және сотталушылардың некесін тіркеуді "Неке (ерлі-зайыптылық) және отбасы туралы" Қазақстан Республикасы кодексінің 233-бабына сәйкес осы тергеу изоляторы орналасқан тіркеуші органы тергеу изоляторында жүргізеді.

95. Күдіктімен, айыпталушымен немесе сотталушымен некеге тұрғысы келетін адам тергеу изоляторына тұрғылықты жері немесе тергеу изоляторы орналасқан орны бойынша тіркеуші органы куәландырған өтінішті (ерікті нысанда), сондай-ақ қылмыстық процесті жүргізуші адамның немесе органның көрсетілген күдіктімен, айыпталушымен және сотталушымен кездесуіне берген рұқсатын (ерікті нысанда)

ұсынады. Некеге тұруға ниет білдіру туралы өтініш келіп түскен кезде тергеу изоляторының әкімшілігі оны күдіктіге, айыпталушыға немесе сотталушыға өзіне қатысты бөлігін толтыру үшін береді.

96. Өтінішке жетіспейтін мәліметтер енгізілгеннен кейін тергеу изоляторының әкімшілігі өтініште көрсетілген мәліметтерді күдіктінің, айыпталушының немесе сотталушының жеке ісіндегі құжаттармен салыстырады. Күдіктінің, айыпталушының және сотталушының қолының түпнұсқасы және көрсетілген мәліметтердің дұрыстығы тергеу изоляторы бастығының қолымен куәландырылады және мекеменің мөрі басылады, содан кейін әкімшілік неке қию туралы бірлескен өтінішті тергеу изоляторы орналасқан жер бойынша тіркеуші органына жібереді.

97. Күдіктінің, айыпталушының немесе сотталушының жеке ісінде оның отбасылық жағдайы туралы мәліметтердің дұрыстығын растайтын құжаттар болмаған жағдайда олар туыстарымен беріледі, ал олар болмаған жағдайда бұрынғы тұрғылықты жері бойынша тіркеуші органына сұрау салу жолданады.

98. Күдікті, айыпталушы немесе сотталушы некеге тұруға ниет білдіру туралы (еркін нысанда) өтініш берген жағдайда, тергеу изоляторының әкімшілігі күдіктінің, айыпталушының немесе сотталушының некеге тұрғысы келетін адамға осы өтінішті жолдайды. Бір уақытта көрсетілген адамға тергеу изоляторының орналасқан жері бойынша тіркеуші органының атауы және мекенжайы хабарланады.

99. Мұндай өтініш алған адам некеге тұруға келіскен кезде оған қатысты бөлігін толтырады және өтініште көрсетілген қолдарды және мәліметтерді куәландыру үшін өзінің тұрғылықты жері бойынша тіркеуші органына береді, бұдан кейін оған тергеу изоляторының әкімшілігі хабарлаған тіркеуші органына өтінішті жолдайды.

100. Тәртіптік жазасын тәртіптік изоляторда өтеп жатқан күдіктімен, айыпталушымен немесе сотталушымен некені тіркеу осы жазалау шарасын өтелгеннен кейін ғана жүзеге асырылады.

101. Тіркеуші орган қамаудағы адаммен неке қиюды (ерлі-зайыпты болуды) мемлекеттік тіркеуді өндірісінде іс бар адамға немесе органға хабарлағаннан кейін жүргізеді.

Тергеу изоляторларының әкімшілігі қылмыстық процесті жүргізуші адамның немесе органның рұқсаты болған кезде, некені тіркегеннен кейін күдіктіге, айыпталушыға немесе сотталушыға Заңның 17-бабына сәйкес жұбайымен (зайыбымен) кездесуге рұқсат етеді.

102. Некені бұзу үшін күдікті, айыпталушы немесе сотталушы сотқа немесе кәмелетке толмаған балалары болмаса жұбайларының өзара келісімі болған кезде тіркеуші органына өтініш жолдайды.

103. Күдіктілер, айыпталушылар және сотталушылар өзге де отбасылық-құқықтық қатынастарға қатысады.

104. Азаматтық-құқықтық мәмілелерді жүзеге асыру үшін күдіктілер, айыпталушылар және сотталушылар, қылмыстық істі жүргізуші адамның немесе органның рұқсатымен сенімхат жазады, оны Қазақстан Республикасының Азаматтық кодексінің 167-бабына сәйкес тергеу изоляторының бастығы куәландырады.

Сенімхат арналып жазылған адамға өндірісінде қылмыстық іс бар адам немесе орган арқылы беріледі.

105. Күдіктіден, айыпталушыдан немесе сотталушыдан сенімхат алуға ниет білдірген азаматтар тергеу изоляторы әкімшілігі өкілінің жеке қабылдауына (еркін нысанды) өтінішпен жүгінеді не оны пошта арқылы жолдайды.

13-тарау. Күдіктілердің, айыпталушылардың және сотталушылардың газеттерге және журналдарға жазылуын жүргізу тәртібі

106. Күдіктілерге, айыпталушыларға және сотталушыларға Қазақстан Республикасының байланыс бөлімшелері арқылы таратылатын газеттер мен журналдарға жазылу құқығы беріледі.

107. Жазылуды ресімдеу үшін күдікті, айыпталушы және сотталушы тергеу изоляторы бастығының атына өтінішпен жүгінеді. Жазылуға ниет білдірген адамға оның өз есебінен абонемент және жеткізу карточкасының бланкілері беріледі.

108. Жазылуды ресімдеуді тергеу изоляторының қызметкері күдікті, айыпталушы және сотталушының жеке шотында бар қаражат есебінен Қазақстан Республикасының байланыс бөлімшесінде жүргізеді.

109. Жазылуды басқа мекенжайға ауыстыру жазылушының жазбаша өтініші бойынша тергеу изоляторы әкімшілігінің рұқсатымен оның өз есебінен жүзеге асырылады.

110. Күдіктінің, айыпталушының және сотталушының атына жазылуды оның туыстары немесе өзге адамдар ресімдейді.

111. Жазылу ресімделетін басылымдардың саны шектелмейді.

14-тарау. Күдіктілер, айыпталушылар және сотталушыларды медициналық-санитариялық қамтамасыз ету

112. Тергеу изоляторында орналасқан медициналық ұйымның медицина қызметкерлері күдіктілер, айыпталушылар және сотталушылар тергеу изоляторына келіп түскеннен кейін бір тәуліктен кешіктірмей міндетті медициналық қараудан, сондай-ақ үш жұмыс күні ішінде флюорографиялық және зертханалық тексеруден өтеді. Медициналық тексеруден өтпеген адамдар басқа күдіктілер, айыпталушылардан және сотталушылардан бөлек ұсталады. Медициналық тексерудің нәтижелері күдіктінің, айыпталушының немесе сотталушының медициналық амбулаториялық картасында белгіленеді.

113. Күдіктілер, айыпталушылар және сотталушылар тергеу изоляторында орналасқан медициналық ұйымның медицина қызметкеріне күнделікті камераларды аралаған кезде медициналық көмекке, ал ауру асқынған кезде тергеу изоляторының кез келген қызметкеріне жүгінеді. Күдікті, айыпталушы немесе сотталушы жүгінген қызметкер оған медициналық көмек көрсету үшін шаралар қабылдайды.

114. Күдіктілер, айыпталушыларға немесе сотталушыларға амбулаториялық жағдайда медициналық көмек камераларда, өзге де үй-жайларда, сондай-ақ тергеу изоляторларында орналасқан медициналық ұйымдардың мамандандырылған кабинеттерінде көрсетіледі. Дәрілік заттарды беру дәрігердің тағайындауы бойынша белгіленген мөлшерде жеке қолхат арқылы жүзеге асырылады.

115. Заңның 24-бабының 3-тармағына сәйкес қамауға алынған адамдардың туыстарынан алған дәрілік заттарды қабылдауы медициналық көрсеткіштер бойынша және тек тергеу изоляторында орналасқан медициналық ұйымның медицина қызметкерлерінің бақылауымен қатаң түрде жүзеге асырылады. Бұл ретте дәрілік заттар тергеу изоляторында орналасқан медициналық ұйымда сақталады.

116. Мамандандырылған медициналық көмек көрсету үшін стационарлық жағдайларда тергеу изоляторларында ұсталатын адамдар (жоспарлы және шұғыл емдеуге жатқызу) "Қылмыстық-атқару (пенитенциарлық) жүйесінің тергеу изоляторлары мен мекемелерінде ұсталатын адамдарға медициналық көмек көрсету қағидаларын бекіту туралы" Қазақстан Республикасы Денсаулық сақтау министрінің 2022 жылғы 30 маусымдағы № ҚР ДСМ-61 бұйрығына (Нормативтік құқықтық актілерді мемлекеттік тіркеу тізілімінде № 28669 болып тіркелген) сәйкес аурулар бейіні бойынша денсаулық сақтау субъектілеріне жіберіледі.

Бұл ретте көрсетілген адамдар жиналмалы күзет құралдарымен жабдықталған оқшауланған палаталарға жатқызылады.

117. Медицина қызметкері күзетпен ұсталатын адамдардың, оның ішінде тергеу әрекеттерінен немесе сот отырыстарынан тергеу изоляторына келген адамдардың, оларда дене жарақаттары мен тері және жұқпалы аурулардың белгілерін анықтау мақсатында сыртқы қарауды өткізеді. Жұқпалы аурулар анықталған кезде олар дереу оқшауланады, эпидемияға қарсы кешенді іс-шаралар өткізіледі. Дене жарақаттарына қарау нәтижелері бойынша акті жасалады.

Дене жарақаттары табылған кезде медицина қызметкері медициналық көмек көрсетеді, бір тәулік мерзімде медициналық куәландыру жүргізіледі, оның нәтижелері қамауға алынған адамның амбулаториялық картасына жазылады. Тергеу изоляторының әкімшілігі күзетпен ұсталатын адамдарда дене жарақаттары табылуының әрбір фактісі туралы бір тәулік мерзімде жазбаша түрде прокуратураға хабарлайды.

118. Заңның 23-бабына сәйкес күдіктінің, айыпталушының немесе сотталушының дене жарақаттарын медициналық куәландыруды денсаулық сақтаудың мемлекеттік

жергілікті басқару органының медициналық ұйымының қызметкерлері мынадай жағдайларда:

- 1) тергеу изоляторы бастығының шешімі бойынша;
- 2) прокурордың нұсқауы бойынша;
- 3) өндірісінде қылмыстық іс бар адамның немесе органның шешімі бойынша;
- 4) дене жарақатын алған күдіктінің, айыпталушының немесе сотталушының өтініші бойынша;
- 5) дене жарақатын алған күдіктінің, айыпталушының немесе сотталушының қорғаушысының өтініші бойынша жүргізеді.

119. Қазақстан Республикасы азаматтарының денсаулығын сақтау саласындағы басшылықты жүзеге асыратын уәкілетті органның денсаулық сақтау ұйымдары қызметкерлерінің куәландыру жүргізулері үшін дене жарақатын алған адам не оның қорғаушысы тергеу изоляторы бастығының атына өтініш (еркін нысанда) береді. Өтініш бір тәулік ішінде қаралады.

15-тарау. Күдіктілер, айыпталушылар және сотталушыларды күнделікті серуенге шығару тәртібі

120. Күдіктілер, айыпталушылар және сотталушылар күнделікті ұзақтығы бір сағаттан кем емес, ал кәмелетке толмағандар екі сағаттан кем емес серуендеуді пайдаланады. Серуендеудің ұзақтығын тергеу изоляторының әкімшілігінің күн тәртібі, ауа райы, мекеменің толтырылуын және басқа да мән-жайларды ескере отырып белгілейді. Жүкті әйелдердің және үш жасқа дейінгі баласы бар әйелдердің серуендеу ұзақтығы үш сағатқа дейін ұзартылады.

121. Күдіктілер, айыпталушылар және сотталушыларға серуендеу көбіне тәуліктің жарық уақытында беріледі. Әр камераларда ұсталатын адамдарды серуендеуге шығару уақыты жылжымалы кесте бойынша белгіленеді.

Тергеу изоляторының ішкі тәртіптеме қағидалары бұзылған жағдайда серуендеу мерзімінен бұрын аяқталады.

122. Серуендеу сипаттамасы осы Қағидаларға 14-қосымшада көрсетілген серуендеу аулаларының аумағында жүргізіледі. Серуендеу аулалары отыруға арналған орындықтармен және жаңбырдан қорғайтын шатырмен жабдықталады. Серуендеу уақытында кәмелетке толмағандарға дене шынықтыру жаттығуларына және спорттық ойындарға мүмкіндік беріледі. Балалары бар әйелдерге арналған серуендеу аулалар көгалдандырылады және құмсалғышпен жабдықталады.

123. Күдіктілер, айыпталушылар және сотталушылар серуендеуді мезгілінен бұрын аяқтау үшін серуендеуге жауапты адамға тиісті өтінішпен жүгінеді, ол тергеу изоляторы бастығының немесе оның орынбасарының назарына жеткізіледі. Көрсетілген лауазымды адам өтініштің мән-жайы бойынша шешім қабылдайды.

16-тарау. Күдіктілер, айыпталушылар және сотталушылардың қорғаушылармен, туыстарымен және өзге де адамдармен жолығысуын өткізу тәртібі

124. Күдіктіге, айыпталушыға немесе сотталушыға туыстарымен және өзге де адамдармен кездесу Заңның 17-бабына сәйкес ұсынылады.

125. Тергеу изоляторының бастығы немесе оның орынбасары жазбаша түрде кездесуге рұқсат етеді және осы Қағидаларға 15-қосымшаға сәйкес нысан бойынша жалпы кезек есебімен оның ұзақтығын белгілейді.

126. Кездесу жалпы кезек тәртібінде ұсынылады. Кездесу басталар алдында оған келген адамдарға кездесу кезінде өзін өзі ұстау тәртібі туралы хабарланады және оны бұзған жағдайда кездесудің тоқтатылатыны туралы ескертіледі.

127. Кездесуге жеке басын куәландыратын құжаттарсыз не мас күйінде келген азаматтар, сондай-ақ рұқсат қағазында көрсетілмеген адамдар кездесуге жіберілмейді. Транзитпен айдауылданған күдіктілер, айыпталушылар және сотталушыларға кездесуге рұқсат берілмейді. Кездесуге рұқсат беруден бас тарту себептері кездесуге келген адамға жарияланады.

128. Күдіктілердің, айыпталушылардың және сотталушылардың туыстарымен және өзге де адамдармен кездесуі қандай да бір заттарды беруге жол бермейтін, бірақ сөйлесуге және көзбе көз қарым-қатынас жасауға кедергі келтірмейтін осы Қағидаларға 16-қосымшаға сәйкес кездесу өткізу үшін жабдықталған бөлмелерде тергеу изоляторы қызметкерлерінің бақылауымен жүргізіледі.

Күдіктілердің, айыпталушылардың және сотталушылардың кездесуге келген адамдармен сөйлесулері тікелей немесе сөйлесу құрылғылары арқылы жүзеге асырылады және тергеу изоляторының қызметкерлерімен тыңдалады.

129. Күдікті, айыпталушы және сотталушының қорғаушымен кездесуі жұмыс уақытында, бөлек, бөлу қалқаларынсыз және олардың саны мен ұзақтығына шектеу қойылмай жүргізіледі. Кездесу тергеу изоляторының қызметкеріне күдіктіні, айыпталушыны, сотталушыны және қорғаушыны көруге мүмкіндік беретін, бірақ сөздері естілмейтіндей жағдайларда жүргізіледі.

130. Күдіктімен, айыпталушымен немесе сотталушымен кездесу іске қорғаушы ретінде қатысатын адвокатқа "Адвокаттық қызмет және заң көмегі туралы" Қазақстан Республикасының Заңында көзделген - адвокат куәлігін және қорғау (өкілдік ету) туралы жазбаша хабарламаны көрсеткен кезде, ҚПК-нің 66-бабының екінші бөлігінің ережелеріне сәйкес іс бойынша қорғаушы болып танылған басқа адамға - өзінің қылмыстық процеске қорғаушы ретінде қатысу құқығын растайтын және жеке басын куәландыратын құжаттарды көрсеткен кезде беріледі.

131. Күдіктілермен, айыпталушылармен және сотталушылармен кездесуге рұқсат алған адамдарға тергеу изоляторлары бастығының немесе оны алмастыратын адамның рұқсатынсыз тергеу изоляторына техникалық байланыс құралдарын, компьютерлерді,

кино-, фото-, аудио-, бейне және көбейткіш аппаратураларды алып кіруге және оларды кездесу кезінде пайдалануға рұқсат берілмейді.

132. Кездесуді мерзімінен бұрын тоқтату Заңның 17-бабына сәйкес жүзеге асырылады.

133. Кездесу уақытынан бұрын тоқтатылған жағдайда тергеу изоляторының оны өткізуге жауапты қызметкері бұл туралы тергеу изоляторының бастығына кездесуді тоқтату себептерін көрсете отырып, жазбаша түрде баяндайды.

134. Күдіктілермен, айыпталушылармен және сотталушылармен қысқа мерзімге кездесулерді тоқтатқан жағдайда (карантинге, ерекше жағдайлар режимін енгізуге байланысты және басқа да себептермен) тергеу изоляторының бастығы бұл туралы тергеу изоляторында заңдылықтың сақталуын қадағалауды жүзеге асыратын прокурорға, тиісті сот және тергеу органдарына хабарлайды, қабылдау бөлмесінде келушілер үшін хабарландыру ілінеді.

17-тарау. Күдіктілердің, айыпталушылардың және сотталушылардың тергеу әрекеттеріне және сот отырыстарына қатысуларын қамтамасыз ету тәртібі

135. Тергеу изоляторының әкімшілігі қылмыстық іс жүргізетін судьялардың, прокурорлардың, тергеушілердің, анықтау жүргізетін адамдардың жұмыс уақытында күдіктілермен, айыпталушылармен және сотталушылармен тергеу әрекеттерін жүргізу үшін тергеу изоляторына кедергісіз келуін қамтамасыз етеді.

136. Кезекші ауысымдардың кезекшілікті тапсыру-қабылдау кезінде (бір сағаттан көп емес), күн тәртібіне сәйкес тамақ ішу кезінде (таңғы, түскі, кешкі ас), сондай-ақ түнгі уақытта (кешкі сағат 22.00-ден таңғы сағат 6-ға дейін), ҚПК-мен көзделген жағдайларды қоспағанда, күдіктілерді, айыпталушыларды және сотталушыларды камералардан кездесуге шығару жүргізілмейді. Көрсетілген уақытта шақыртулар бойынша шығарылған күдіктілер, айыпталушылар және сотталушылар камераларға қайтарылады.

137. Тергеушінің, анықтауды жүргізетін адамның, прокурордың немесе соттың (судьяның) нұсқауы бойынша тергеу амалдарын, амбулаторлық сот-психиатриялық және басқа да сараптамаларды өткізу үшін тергеу изоляторының аумағында оның әкімшілігі:

- 1) жабдықталған үй-жай береді;
- 2) күдіктіні, айыпталушыны немесе сотталушыны жеткізеді және оның күзетін қамтамасыз етеді;
- 3) тергеу изоляторына тергеу амалдарына қатысуға тартылған өзге де адамдардың кіруін қамтамасыз етеді;
- 4) күдіктінің, айыпталушының немесе сотталушының мекеменің қоймасында сақталған немесе өзінің жеке пайдалануындағы мүлкін тінтуді, алуды, тыйым салуды жүргізеді.

138. Күдіктілер, айыпталушылар және сотталушылар тергеу изоляторының әкімшілігінен қолда сақтау үшін мына құжаттарды қолхат арқылы алады:

айыптау актісінің көшірмесі;

тергеушіні, анықтаушыны, қорғаушыны, судьяны ауыстыру туралы хабарлама;

Қазақстан Республикасы Қылмыстық кодексінің (бұдан әрі – ҚК) басқа бабы бойынша сотқа дейінгі тергеу басталғаны туралы қаулының көшірмесі;

үкімнің немесе сот ұйғарымының көшірмесі.

139. Апелляциялық және кассациялық инстанцияның істі қарауы туралы хабарлама; күзетпен ұстау мерзімін ұзарту туралы хабарлама; бір органнан басқа органға ауыстыру туралы хабарлама күдіктілерге, айыпталушыларға және сотталушыларға қолхат арқылы жарияланады және олардың жеке істеріне тігіледі.

140. Күдіктілер, айыпталушылар және сотталушылар тергеу әрекеттерін жүргізуге және соттарға этаппен апару алдында заттай нормаларға сәйкес тамақпен қамтамасыз етіледі.

18-тарау. Күдіктілерге, айыпталушыларға және сотталушыларға көтермелеу және жазалау шараларын қолдану тәртібі

141. Көтермелеу және жазалау шаралары тергеу изоляторында ұсталатын барлық күдіктілерге, айыпталушыларға және сотталушыларға Заңның 37-39-баптарына сәйкес қолданылады.

142. Сөгіс тергеу изоляторы бастығының қаулысымен беріледі. Тәртіптік изоляторға немесе уақытша оқшаулау үй-жайына қамау түріндегі жаза тергеу изоляторы бастығының дәлелді қаулысымен осы Қағидаларға 17-қосымшаға сәйкес нысан және медицина қызметкерінің күдіктінінің, айыпталушының немесе сотталушының онда болу мүмкіндігі туралы қорытындысы бойынша беріледі. Жаза беру туралы қаулылар қолхат арқылы жарияланады. Қаулының көшірмесі тексеру материалдарымен бірге осы адамның жеке ісіне тігіледі.

Тергеу изоляторының бастығы болмаған жағдайда күдіктілер, айыпталушылар немесе сотталушылар кезекші көмекшінің баянаты бойынша тәртіптік изоляторға, тергеу изоляторының бастығы келгенге дейін, бірақ 24 сағаттан аспайтын мерзімге қамалады.

Ауызша жарияланғандардан басқа барлық көтермелеулер мен жазаларды корпус бойынша аға қызметкер камералық карточкаларға енгізеді және осы Қағидаларға 18-қосымшаға сәйкес нысан бойынша арнайы есепке алу бөлімінің қызметкері жүргізетін күдіктілердің, айыпталушылардың және сотталушылардың жазаларын және көтермелеулерін есепке алу кітабында есепке алынады.

Сипаттамасы осы Қағидаларға 19-қосымшада көрсетілген тәртіптік изоляторға немесе уақытша оқшаулау үй-жайына қамауға жазаланған адамдарға мұқият тінту

жүргізіледі және олар тәртіптік изоляторға немесе уақытша оқшаулау үй-жайына бекітілген киімдерді киеді.

Тәртіптік изоляторға немесе уақытша оқшаулау үй-жайына қамалған адамды санитариялық тазалау, ол жазаларын өтегеннен кейін, ал дәрігердің нұсқауы бойынша оны тәртіптік изоляторда немесе уақытша оқшаулау үй-жайында ұстау кезеңінде де жүргізіледі. Дәрігердің науқастанғанды тәртіптік изолятордан немесе уақытша оқшаулау үй-жайынан мерзімінен бұрын босату туралы нұсқауы дереу орындауға жатады.

143. Тәртіптік изоляторға немесе уақытша оқшаулау үй-жайына қамалған адамды тергеушіге немесе сотқа шығару, сондай-ақ тергеу изоляторынан уақытша кетуі оны салынған жазаны одан әрі өтеуден босатпайды.

19-тарау. Тергеу изоляторы бастығының немесе ол уәкілеттік берген адамдардың күдіктілерді, айыпталушыларды және сотталушыларды жеке қабылдау тәртібі

144. Тергеу изоляторы бастығының немесе ол уәкілеттік берген адамдардың күдіктілер, айыпталушылар және сотталушыларды жеке қабылдауы демалыс және мереке күндерін қоспағанда, күнделікті жұмыс уақытында жүзеге асырылады.

145. Күдіктілер, айыпталушылар және сотталушыларды жеке қабылдау олардың назарына жеткізілетін кесте бойынша жүргізіледі. Қажет болған кезде, жеке қабылдау кестеден тыс қосымша өткізіледі.

146. Күдіктілерді, айыпталушыларды және сотталушыларды жеке қабылдауға жазуды тергеу изоляторының қызметкерлері күн сайын камераларды аралаған кезде жүзеге асырады. Қабылдау туралы өтініш тергеу изоляторы бастығының атына жазбаша түрде беріледі немесе ауызша айтылады және күдікті, айыпталушы және сотталушы қабылдауына барғысы келген лауазымды адамды көрсете отырып, жеке қабылдау журналында кезектілік тәртібінде тіркеледі.

147. Қабылдау өтініш беру кезектілігінің тәртібінде өткізіледі. Қабылдау аяқталған соң журналда және жеке қабылдау туралы өтініште оның нәтижелері жазылады. Өтініш күдіктінің, айыпталушының және сотталушының жеке ісіне тігіледі.

20-тарау. Тергеу изоляторларында қайтыс болған күдіктілер, айыпталушылар және сотталушылардың мәйіттерін беру тәртібі

148. Тергеу изоляторының әкімшілігі күдіктінің, айыпталушының және сотталушының қайтыс болуы туралы оның жақын туыстарына, осы факті бойынша тексеру жүргізетін прокурорға, сондай-ақ өндірісінде қылмыстық іс бар адамға немесе органға дереу хабарлайды.

Егер қайтыс болған адамның туыстары тергеу изоляторы орналасқан қалада тұрмаса, хабар пошта арқылы жіберіледі.

149. Қайтыс болған адамның мәйітін алуды талап еткенге дейін, бірақ жеті тәуліктен асырылмай не уәкілетті органның қайтыс болу фактісі бойынша тексеру аяқталғанға дейін жақын жердегі денсаулық сақтаудың медициналық ұйымындағы мәйітханаға сақтауға тапсырылады. Қайтыс болған адамның мәйітін алуға оның жақын туыстарының айрықша құқығы бар. Олар болмаған немесе мәйітті алудан бас тартқан кезде мәйітті беруді талап еткен адамға беріледі.

150. Мәйітті беру өндірісінде қылмыстық іс бар адамның немесе органның рұқсатымен талап еткен адамның жазбаша өтініші бойынша жүзеге асырылады. Мәйітті алу үшін жеке басын куәландыратын құжатты көрсету керек.

151. Қайтыс болған адамның туыстарына немесе өзге де адамдарға қайтыс болғаны туралы куәлік алу тәртібі түсіндіріледі. Жерлеу жабдықтарын мәйітті беруді талап еткен адам қамтамасыз етеді. Жерлеу оның есебінен жүзеге асырылады.

152. Егер қайтыс болған адамның туыстары немесе өзге де адамдар мәйітті алуға уақтылы келе алмаса, олар бұл туралы хабарлайды және мәйітті белгіленген уақыттан артық сақтау құнын төлейді.

153. Қайтыс болған күдіктінің, айыпталушының және сотталушының көрсетілген мерзімде талап етілмеген мәйіті мемлекет есебінен жерлеуге беріледі.

21-тарау. Күдіктілерді, айыпталушыларды және сотталушыларды күзеттен босату тәртібі

154. Күдіктілерді, айыпталушыларды немесе сотталушыларды күзеттен босатуды тергеу изоляторының бастығы тергеушінің, анықтаушының, прокурордың немесе судьяның дәлелді қаулысын алғаннан кейін не соттың дәлелді қаулысы бойынша жүзеге асырады.

155. Тергеу изоляторының бастығы күдіктіні, айыпталушыны немесе сотталушыны күзетпен ұстау мерзімі өткенге дейін 24 сағаттан кешіктірмей бұл туралы өндірісінде қылмыстық іс бар органға немесе адамға, сондай-ақ прокурорға жазбаша хабарлайды.

156. Бұлтартпау шаралары ретінде күзетпен ұстау мерзімін ұзарту туралы тергеу судьяның қаулысын факсимильдік байланыс бойынша қабылдауға жол беріледі, қаулының түпнұсқасы пошта бойынша қабылданады. Егер бұлтартпау шарасы ретінде күзетпен ұстау мерзімі өткеннен кейін күдіктіні, айыпталушыны немесе сотталушыны босату туралы не бұлтартпау шарасы ретінде күзетпен ұстау мерзімін ұзарту туралы тиісті шешім келіп түспесе тергеу изоляторының бастығы оны өзінің қаулысымен босатады, оның көшірмесін 24 сағат ішінде өндірісінде қылмыстық іс бар органға немесе адамға және прокурорға жібереді.

157. Күдіктіні, айыпталушыны және сотталушыны нақты босатуға дейін күзетпен ұстау мерзімін ұзарту туралы тергеу судьясының қаулысы келіп түскен жағдайда тергеу изоляторының бастығы өзінің қаулысының күшін жояды, ол туралы прокурорға хабарлайды.

158. Күзеттен босатылған күдіктіге, айыпталушыға немесе сотталушыға жеке құжаттары, заттары, жеке шотында сақталған ақшалары, сондай-ақ оның күзетпен ұстау мерзімі және босату негіздері көрсетілген анықтама беріледі.

159. Күзеттен босатылған күдіктілердің, айыпталушылардың немесе сотталушылардың жеке шотында жеткілікті ақша сомасы болмаған кезде тұрғылықты жеріне теміржол, автомобиль немесе су көлігімен бару жолында жол жүрумен, тамақпен, сондай-ақ маусым бойынша киім және аяқ киіммен қамтамасыз етіледі.

Босатылатын адамды тамақпен, киіммен және аяқ киіммен қамтамасыз ету заттай нормаларға сәйкес жүзеге асырылады.

Мекеме әкімшілігі босатылғанға он күн қалғанда босатылатын адамға Қазақстан Республикасы аумағының шегінде тұрғылықты жеріне немесе жұмыс орнына дейін жол жүру билетін сатып алады.

Қылмыстық-атқару жүйесі
тергеу изоляторларының ішкі
тәртіптеме қағидаларына
1-қосымша

Күдіктілердің, айыпталушылардың және сотталушылардың тергеу изоляторларындағы мінез-құлық қағидалары

1. Тергеу изоляторларында ұсталатын күдіктілер, айыпталушылар және сотталушылар:

1) Заңмен және осы Қылмыстық-атқару жүйесі тергеу изоляторларының ішкі тәртіптеме қағидаларында белгіленген қамауда ұстау тәртібін сақтайды;

2) тергеу изоляторы әкімшілігінің заңды талаптарын сақтайды;

3) гигиена және санитария талаптарын сақтайды;

4) күнделікті серуенге шығады (серуеннен босатуды медициналық қызметкердің қорытындысы бойынша тергеу изоляторының бастығы жүзеге асырады);

5) өрт қауіпсіздігі қағидаларын сақтайды;

6) тергеу изоляторының мүлкіне ұқыпты қарайды;

7) кезектілік тәртіпте камераларды және басқа да үй-жайларды тазалайды;

8) тергеу изоляторы қызметкерлерінің, күдіктілердің және айыпталушылардың, сондай-ақ өзге де адамдардың ар-намысын қорлайтын әрекеттер жасамайды, қызметкерлермен "Сіз" деп сөйлеседі;

9) тергеу изоляторының қызметкерлеріне, сондай-ақ күзетпен ұстау тәртібін қамтамасыз ететін өзге адамдарға қызметтік міндеттерін атқаруда кедергі келтірмейді;

10) белгіленген күн тәртібін сақтайды;

11) камераға тергеу изоляторының қызметкерлері кірген кезде олардың командасы бойынша орнынан тұрады және көрсетілген орында қатарға тұрады;

12) айдауылмен жүрген немесе тергеу изоляторының қызметкерлері ілесіп жүрген кезде қолдарын артында ұстайды;

13) тергеу изоляторы қызметкерлерінің, өзге де лауазымды адамдардың талабы бойынша өзінің тегін, атын, әкесінің атын (болған жағдайда) айтады;

14) тыныштық сақтайды;

15) кезектілік тәртіпте камера бойынша кезекшілік атқарады.

2. Камера бойынша кезекші:

1) камераға тергеу изоляторының қызметкерлері кірген кезде, камерада отырған күдіктілердің, айыпталушылардың және сотталушылардың саны туралы баяндайды;

2) камера мүкәммалының, жабдықтарының және басқа мүлкінің сақталуын бақылайды;

3) камерада ұсталатын адамдар үшін ыдыс алады және оны тапсырады;

4) камерада тазалықты бақылайды;

5) камерада еден сыпырады және жуады, камераның сантехникалық торабын, серуендеу аяқталғаннан кейінсеруендеу ауласын тазалайды;

6) ауыз суға арналған ыдысты жуады.

3. Күдіктілердің, айыпталушылардың және сотталушылардың тәртіп бұзуы болып табылады:

1) тергеу изоляторының басқа камераларында немесе өзге де үй-жайларында ұсталатын адамдармен серуендеу аулаларында сөйлесуі, оларға қандай да бір заттарды беруі, тықылмен белгі беруі немесе олармен хат алмасуы;

2) сөйлесудің белгіленген тәртібін бұзуы, бостандықта жүрген немесе бас бостандығынан айыру орындарында жазасын өтеп жатқан адамдарға қандай да бір заттар беруі және олармен хат алмасуы;

3) әкімшіліктің рұқсатынсыз камералардан және режимдік корпустардың басқа да үй-жайларынан шығуы;

4) тергеу изоляторлары объектілерінің күзет желісін бұзуы;

5) алкогольдік ішімдіктерді, есірткі және психотроптық заттарды дайындауы және пайдалануы;

6) материалдық немесе өзге де табыс табу мақсатында үстел ойындарын ойнауы;

7) өзіне немесе басқа адамдарға татуировкалар жасауы;

8) әкімшіліктің рұқсатынсыз жатын орындарына перде ілуі және ауыстыруы;

9) қолдан жасалған электр құралдарын пайдалануы;

10) әкімшіліктің рұқсатынсыз электр құралдарын пайдалануы;

11) камерада ашық от жағуы;

12) жануарлар ұстауы;

13) әкімшіліктің рұқсатынсыз сантехника, жарық бергіш және басқа да құралдарды жөндеуі немесе камера жарығын реттеуі;

14) камераларда сантехникалық тораптарды ластауы;

15) камералардың қабырғаларынан тергеу изоляторларында ұсталатын күдіктілердің, айыпталушылардың және сотталушылардың негізгі құқықтары мен міндеттері туралы ақпаратты алып тастауы;

16) қабырғаларды, камера мүкаммалын қағазбен, фотосуреттермен, суреттермен, газет және журнал қиындыларымен желімдеуі, оларға жазу жазуы немесе суреттер салуы;

17) тыныштықты бұзуы;

18) тергеу изоляторының аумағында қозғалу кезінде саптан шығуы, темекі шегуі, сөйлесуі, камера тесігінен сығалауы, қандай да бір заттарды жоғары көтеруі, дабыл сигнализациясының түймесін басуы;

19) терезелерден бірдене тастауы, терезе алдына шығып тұруы, желдеткіштен басын шығаруы, есіктің "көзшесіне" жабыса тақалуы, "көзшені" жабуы;

20) жеке пайдалану заттарын сатуы, сыйлауы немесе өзге де тәсілмен иеліктен шығаруы;

21) өз өмірі мен денсаулығына, сондай-ақ басқа адамдардың өмірі мен денсаулығына қауіп төндіретін қасақана іс-әрекеттер жасауы;

22) медициналық қызметкердің ұсынымы бойынша тергеу изоляторы бастығының рұқсатынан басқа, күн тәртібімен ұйықтауға бөлінбеген уақытта жатын орындарын пайдалануы;

23) камераларда темекі шегуі (темекі шегуге арналған орынды тергеу изоляторының әкімшілігі белгілейді);

24) тамақ дайындауы;

25) камераларда киім, аяқ киім және іш киім жууы.

Қылмыстық-атқару жүйесі
тергеу изоляторларының ішкі
тәртіптеме қағидаларына
2-қосымша
нысан

Тергеу изоляторын инспекциялайтын адамдардың ескертулері мен ұсыныстарының кітабы

(тергеу изоляторының атауы)

" ____ " _____ басталды
" ____ " _____ аяқталды

р/с №	Күні	Инспекцияла й т ы н адамның лауазымы, ТАӘ (әкесінің аты болған жағдайда), атағы	Ескертулерді ң мазмұны	Ұсыныстар	Орындау мерзімі	Қабылданған шаралар
-------	------	--	---------------------------	-----------	--------------------	------------------------

Ескертпе:

1. Кітап нөмірленеді, тігіледі, тиісті қолмен куәландырылады және сүргішті мөр қойылады. Кітап тергеу изоляторының бастығында сақталады.
2. Кітап қарау үшін және тергеу изоляторларын инспекциялауға құқығы бар адамдарға онда тиісті жазбалар жазу үшін ұсынылады.
3. Инспекциялайтын адамкітапқа өзқұзыретініңшегінде барлық мәселелер бойынша негізгі ескертулері мен ұсыныстарын енгізеді. Бұл ретте анықталған кемшіліктерді жою мерзімдері көрсетіледі.
4. Тергеу изоляторының бастығы инспекциялайтын адам белгілеген мерзімде кемшіліктердің жойылғаны туралы жоғары тұрған бастыққа баяндайды.

Қылмыстық-атқару жүйесі
тергеу изоляторларының ішкі
тәртіптеме қағидаларына
3-қосымша
нысан
Бекітемін
Тергеу изоляторының бастығы

(лауазымы, қолы, тегі)
_____ жылғы " ____ " _____

Камера бойынша орналастыру жоспары

Бөлек ұсталады	Камера №	Камерадағы орын саны	Ескертпе
1	2	3	4

Жоспар камера бойынша кезекші бөлімнің, жедел қызмет, режимдік және арнайы есеп сейфінде орналасқан.

Тергеу изолятор бастығының орынбасары
(атақ, қол, тегі)

Қылмыстық-атқару жүйесі
тергеу изоляторларының ішкі
тәртіптеме қағидаларына
4-қосымша

Жалпы камераларды жабдықтау

Күдіктілер, айыпталушылар және сотталушылар ұсталатын камералардың құрылысы сыртқы қоршаған ортадан және жапсарлас үй-жайлардан сенімді оқшаулауды қамтамасыз етеді. Камералардың жоспарлану нысаны есіктің "көзшесі" арқылы олардың неғұрлым жақсы көрінуін қамтамасыз етеді.

Камералардағы есік көлемі 90x200 сантиметр (бұдан әрі - см.) екі жақты болады. Еден деңгейінен 95 см. биіктікте 18x22 см тамақ таратуға арналған терезе орналасады. Жалпы камераларды көлемі 1,88x0,65 метр жоспарында екіқабатты кереуеттермен, бір

адамға 0,4 метр үстел периметрінің есебіндегі үстелдермен және ағаш орындықтармен ұзына бойы 1 метрге 5 орын есебіндегі киім ілуге арналған шкафпен жабдықтау қажет. Камералардың барлық жабдықтары еденге бекітіледі.

Әр камерада қолжуғыштан және унитаздан тұратын санитариялық торап жабдықталады. Санитариялық торап бөлгішпен бөлініп тұрады.

Терезенің ішкі жағынан терезе тесігіне қолжетімділіктішектейтін, қабырғадан 25х30 см. бері шығып тұратын тор қойылуы тиіс. Барлық камераларға боялған еден салу қажет.

Қылмыстық-атқару жүйесі
тергеу изоляторларының ішкі
тәртіптеме қағидаларына
5-қосымша
нысан
Санкциялаймын

Прокурор

(қолы, тегі)
_____ жылғы " ____ " _____

"Адамдарды қоғамнан уақытша оқшаулауды қамтамасыз ететін арнаулы мекемелерде, арнаулы үй-жайларда ұстау тәртібі мен шарттары туралы" Қазақстан Республикасы Заңының 31-бабы тәртібінде күдіктіні, айыпталушыны және сотталушыны жалғыз адамдық камераға ауыстыру туралы қаулы

Күдікті, айыпталушы немесе сотталушы

(тегі, аты, әкесінің аты (болған жағдайда))

(жалғыз адамдық камерада ұстау үшін негіз болған

мән-жайлар жазылады)

Қаулы етті:

Күдікті, айыпталушы немесе сотталушы

(тегі, аты, әкесінің аты (болған жағдайда))

одан әрі жалғыз адамдық камерада ұстау үшін ауыстырылсын.

Тергеу изоляторларының бастығы _____

(атағы, тегі, қолы)

_____ жылғы " ____ " _____

Қылмыстық-атқару жүйесі
тергеу изоляторларының ішкі

Күдіктілер, айыпталушылар және сотталушылардың өздерінде болуға, сақтауға, сәлемдемелер, сәлем-сауқаттар арқылы алуға және қолма-қол төлемсіз сатып алуға рұқсат етілген тамақ өнімдері, бірінші кезекте қажетті заттар, аяқ киім, киім-кешек және басқа да өнеркәсіптік тауарлардың тізбесі

Күдіктілер мен айыпталушылар өздерінде болуға, сақтауға болатын, сауқаттар, сәлемдемелермен және қолма-қол төлемсіз ала алатын заттар:

1) жылытуды талап ететін, сақтау мерзімі өткен, сондай-ақ ашытқы, алкогольдік ішімдіктерден және сырадан басқа тамақ өнімдері;

2) темекі бұйымдары, сіріңке (темекі бұйымдары 2 кг, темекі немесе папирос 20 қораптан аспауы тиіс);

3) белдіксіз, галстуксіз, тартпасыз киімдердің бір жиынтығы (оның ішінде белгіленген үлгідегі), сондай-ақ бас киім, маусым бойынша аяқ киім (супинаторсыз, темір тағасыз);

4) бір жиынтық спорт костюмі немесе әйелдердің үйге киетін халаты (белгіленген үлгідегі киім алған күдіктілерден және айыпталушылардан басқа);

5) іш киімдер;

6) шұлық;

7) шұлықтар немесе колготкалар (әйелдерге арналған);

8) қолғаптар немесе биялайлар;

9) бет орамалы;

10) бөлме аяқ киімдері немесе спорттық аяқ киімдер (бір жұп);

11) жуыну жабдықтары (иіс, шаруашылық сабыны, сұйық сабын немесе су сабын (тергеу изоляторында орналасқан медициналық ұйым дәрігерінің тағайындауы бойынша) тіс пастасы, тіс щеткасы, сабынға және тіс щеткасына арналған пластмасса қораптар, крем, тарауыш тарак);

12) қалта айнасы (камерада айна болмаған жағдайда), электр немесе бір ретпайдаланылатын қауіпсіз ұстара;

13) заттарға арналған қап немесе сөмке;

14) көзілдірік және көзілдірікке арналған пластмасса қорап;

15) үшбұрышты орамал, рейтуз, белдік, бюстгальтерлер, дәке, шашқыстырғыш, мақта, гигиеналық және косметикалық заттар (әйелдерге арналған);

16) балдақ, ағаш қолтаяқ, протездер, мүгедектер арбалары, опраправасы бағалы емес металдардан жасалған көзілдіріктер, көзге салынатын линзалар және оларды күтіп-баптау құралдары (дәрігердің рұқсаты бойынша);

17) зауытта жасалған тұрмыстық электр қайнатқыш;

18) жөке немесе ысқыш;

19) шарикті автоқаламсап, оның стерженьдері, қарындаштар;

20) хат жазатын қағаз, оқушы дәптерлері, пошта конверттері, ашық хаттар, пошта маркалары;

21) тергеу изоляторының дүкенінен (дүңгіршегінен) немесе электрондық сауда алаңынан сатып алынған дәретхана қағазы;

22) бірыңғай ақ түсті төсек жабдығының бір жиынтығы (екі жайма және жастықтысы), сүлгі;

23) тергеу изоляторының кітапханасынан не әкімшілік арқылы сауда желілерінен сатып алынған көркем және өзге де әдебиет, сондай-ақ мерзімді баспа басылымдары;

24) фотокарточкалар екіден аспауы керек;

25) үстел ойындары (дойбы, шахмат, домино, нард);

26) бала күтуге арналған заттар (дәрігердің рұқсаты бойынша үш жасқа дейінгі баласы бар әйелдер);

27) тергеу изоляторында орналасқан медициналық ұйымның дәрігері тағайындаған дәрілік заттар.

Тамақ өнімдерінің тізбесі халықтың санитарлық-эпидемиологиялық саламаттылығы саласындағы мемлекеттік бақылау мен қадағалаудың уәкілетті органының нұсқамасы бойынша шектеледі. Күдіктінің, айыпталушының немесе сотталушының өзімен бірге сақтай алатын тамақ өнімдерінің, бірінші кезекте қажетті заттардың, аяқкиімнің, киім-кешектің және басқа да өнеркәсіптік тауарлардың жалпы салмағы 35 килограмнан, оның ішінде кофе мен шай 2 килограмнан аспауы тиіс. Осы тізбеде көзделмеген заттар және құралдар тыйым салынған заттар болып табылады.

Қылмыстық-атқару жүйесі
тергеу изоляторларының ішкі
тәртіптеме қағидаларына
7-қосымша
нысан

Акт

Біз, төменде қол қойған комиссия құрамында _____

(лауазымы, атағы, тегі, аты, әкесінің аты (болған жағдайда)

күдіктіден, айыпталушыдан, сотталушыдан (сақтауға қабылдадық)

(тегі, аты, әкесінің аты (болған жағдайда)

құндылықтарды, ақшаны (_____) _____ сомасында,

_____ заттар мен тамақ өнімдерін алып

қоюды жүргіздік, "Адамдарды қоғамнан уақытша оқшаулауды қамтамасыз ететін арнаулы мекемелерде, арнаулы үй-жайларда ұстау тәртібі мен шарттары туралы"

Қазақстан Республикасы Заңының 33-бабына сәйкес санамаланады.

Барлығы берілгені: _____ құндылықтар атауы, _____ ақша,

Тамақ өнімдерінің, заттардың атауы

(саны)

бердім: _____ (тегі, аты, қолы)


қабылдадым: _____ (тегі, аты, қолы)

қатысқандар: _____ (тегі, аты, қолы)

20 ____ жылғы " ____ " _____

Қылмыстық-атқару жүйесі
тергеу изоляторларының ішкі
тәртіптеме қағидаларына
8-қосымша
нысан

Кереуетті жинау ҮЛГІСІ



Кереуетті жинау үлгісінің сипаттамасы

Қылмыстық-атқару жүйесі
тергеу изоляторларының ішкі
тәртіптеме қағидаларына
9-қосымша

Қосымша ақылы қызмет көрсету тізбесі және тәртібі

1. Заңның 25-бабына сәйкес тергеу изоляторының әкімшілігі күдіктілерді, айыпталушыларды және сотталушыларды тиісті жағдайлар болған кезде мынадай қосымша ақылы тұрмыстық, медициналық, сауықтыру және өзгеде қызмет түрлерімен қамтамасыз етеді:

- 1) емдеудің жекелеген түрлері;
- 2) денсаулық сақтау органдарының дәрігер-мамандарының консультациялары;

- 3) киім және іш киімді жуу және жөндеу;
- 4) аяқ киім жөндеу;
- 5) уақытша пайдалануға электр ұстараларын, электржелдеткіштер, тоңазытқыштар беру;
- 6) заң консультациялары;
- 7) мекемеде ұсталатын адамдардың жеке ісінде бар құжаттардың көшірмелерін түсіру.

2. Күдіктілерге, айыпталушыларға және сотталушыларға қосымша ақылы қызметті тергеу изоляторларының қызметкерлері және осы мақсаттар үшін тартылған тиісті даярлығы мен лицензиясы бар мамандар көрсетеді.

3. Қосымша ақылы қызметті алу үшін күдікті, айыпталушы немесе сотталушы тергеу изоляторы бастығының атына оның жеке шотынан ақылы қызметті көрсетуге ақшаны алуға өтініш жазады. Тергеу изоляторларының жауапты қызметкері күдіктінің, айыпталушының немесе сотталушының жеке шотында тиісті ақшаның бар-жоғын тексереді және өтінішке белгі қояды, содан кейін тергеу изоляторларының бастығы өтініштің мәні бойынша шешім қабылдайды.

4. Қызмет көрсету төлемі сол жердегі қолданыстағы бағаларға сәйкес жүргізіледі.

Қылмыстық-атқару жүйесі
тергеу изоляторларының ішкі
тәртіптеме қағидаларына
10-қосымша
нысан

Жеке шотында _____ теңге № _____ камера түбір. _____
_____ бар. _____

(күдіктінің, айыпталушының және сотталушының тегі, аты, әкесінің аты (болған жағдайда)

Бухгалтер _____
_____ жылғы " ____ " _____

Өтініш

Төмендегі тамақ өнімдерін және бірінші кезекте қажетті заттарды сатып алуды сұраймын:

р/с №	Тамақ өнімдерінің немесе заттардың атауы	Қанша сатып алу талап етіледі	Жіберілген саны (салмағы)	Құны (теңге)
1	2	3	4	5

Барлығы:

Ескертпе:

Күдікті, айыпталушы немесе сотталушы 2 және 3-бағандарды толтырады.

Күдіктінің, айыпталушының немесе сотталушының қолы

сомасы _____ теңгеге азық-түлікті және бірінші кезекте
(жазбаша)

қажетті заттарды алғандығы туралы қолхат.

Бұл соманы менің жеке шотымнан алуды сұраймын

(күдіктінің, айыпталушының немесе сотталушының қолы)

_____ жылғы " ____ " _____

Қылмыстық-атқару жүйесі
тергеу изоляторларының ішкі
тәртіптеме қағидаларына
11-қосымша

Сәлемдемелерді қабылдау бөлмесіндегі жиһаздың және мүкәммалдың тізбесі

1. Сәлемдемелерді тексеруге арналған үстел;
2. Сәлемдемелерді қоюға арналған сөрелер;
3. Тара, камераларға сәлемдемелерді жеткізуге арналған себеттер, сөмкелер;
4. Тоңазытқыш;
5. Пышақтардың, қасықтардың, ыдыстардың және т.б. қажетті саны;
6. Қолжуғыш, айна, сабын, орамал;
7. Таразы, гiр жиынтығы;
8. Бақылаушыларға арналған ақ халаттар, бас киiмдер және медициналық қол қап.

Қылмыстық-атқару жүйесі
тергеу изоляторларының ішкі
тәртіптеме қағидаларына
12-қосымша
нысан

Өтініш

Азамат _____
(тегі, аты, әкесінің аты (болған жағдайда))

_____ мекенжайы бойынша тұратын
(тұратын жерінің мекенжайы)

Күдіктіге, айыпталушыға немесе сотталушыға арналған сәлемдемені
қабылдауыңызды өтінемін

(тегі, аты, әкесінің аты (болған жағдайда))

_____ (туған жылы)

Сәлемдемедегі азық-түліктердің тізілімдемесі:

		Салмағы		

р/с №	Азық-түліктердің немесе заттардың атауы	(кг,г)	Саны	Ескертпе
1	2	3	4	5

Өтініш берушінің қолы _____

_____ жылғы " ____ "

Сәлемдемені қабылдадым _____

(сәлемдемені қабылдаған қызметкердің қолы)

Сәлемдемені алдым _____

(сәлемдемені алған күдіктінің, айыпталушының немесе сотталушының қолы)

_____ жылғы " ____ "

Қылмыстық-атқару жүйесі
тергеу изоляторларының ішкі
тәртіптеме қағидаларына
13-қосымша

Азық-түлік және заттай сәлемдемелер мен сауқаттарды тексеру тәртібі

1. Нан тағамдары (бөлкелер, батондар, және т.б.) екі, үш бөлікке бөлінеді.
2. Сұйық тамақтар басқа ыдысқа құйылады.
3. Консервілер ашылады да және басқа ыдысқа салынады.
4. Балық екі, үш бөлікке бөлінеді.
5. Шұжық тағамдары бірнеше бөліктерге бөлінеді.
6. Шашылатын заттар қайта салынады.
7. Кәмпиттер орамсыз қабылданады.
8. Хат алмасуды және тыйым салынған заттарды жасыру үшін пайдаланылатын

басқа

да барлық азық-түліктер осы тәртіпте тексерілуі тиіс. Тексеру азық-түліктердің өз сапасын жоғалтпайтындай жүргізіледі.

9. Заттар және құралдар да мұқият тексерілуі тиіс.

Қажет болған жағдайда іздеу құралдары пайдаланылады.

Қылмыстық-атқару жүйесі
тергеу изоляторларының ішкі
тәртіптеме қағидаларына
14-қосымша

Серуендеу аулаларының сипаттамасы

Серуендеу аулаларын әдеттегідей режимдік корпустардың жоғарғы қабаттарында орналастыру қажет. Мүмкіндік болмаған жағдайда олар режимдік аулада орналасады және жерасты және жерүсті жолдар корпустарымен бірлесіп немесе оларға толықтай жабысып тұру керек.

Серуендеуге шығатын әр қамаққа алынғанғасеруендеуауласы 2,5-3 шаршы метр (бұдан әрі – м2) болуы тиіс. Серуендеуауласының ең аз көлемі - 12 м2.

Серуендеуауласының үстіңгі жағында металл жиек жапсырылады, ұяшығы 17х17 сантиметрден аспайтын металл торлар құйылады, ұяшығы 5х5 сантиметрден аспайтын "Рабица" типтес металл тор бекітіледі.

Серуендеуаулаларының есігі камера типтес желдеткішсіз жабдықталады. Әрбір серуендеу ауласының ортасында еденге жақсы жапсырылған орындықтар қойылады. Серуендеу аулаларының үстіңгі жағында бақылаушыларға қарама-қарсы жерде атмосфералық жауын-шашыннан тасалау үшін ені 1, 2 метрдей жеңіл шымылдықтар ілінеді.

Серуендеу аулаларынан міндетті түрде су көзімен қамтамасыз етілуі керек.

Науқастарға, балалары бар әйелдер мен жүкті әйелдерге арналған серуендеу аулаларына шөп, гүл егуге рұқсат етіледі.

Балалар үшін құмдағыштар орнатылады.

Серуендеу аулаларының үстіңгі жағында серуендеу аулаларында жүрген барлыққамаққа алынғандарды әр уақытта бақылаушының қадағалауында болу үшін тұғыр орнатылады. Бақылаушының бекетінде күзет-дабыл сигналы және аппараты немесе кезекшімен телефонмен байланысу үшін розеткалар орнатылады.

Қылмыстық-атқару жүйесі
тергеу изоляторларының ішкі
тәртіптеме қағидаларына
15-қосымша
нысан

№ _____
(облыс атауы)
тергеу изоляторының бастығына

Туыстарымен және өзге де адамдармен кездесуге рұқсат қағазы

Азамат(ша) _____

(тегі, аты, әкесінің аты (болған жағдайда))

ҚК-нің _____ бабында көзделген қылмысты жасағаны үшін жазаға тартылған,
_____жылғы "___" _____ туған,

_____ (қылмыстық процесті жүргізетін органның атауы)

тіркелген _____ -мен кездесуге рұқсат
етілгенін

(күзетпен ұсталатын адамның тегі, аты, әкесінің аты (болған жағдайда))
хабарлаймыз.

_____ қолы _____

(қылмыстық процесті жүргізетін адамның лауазымы, тегі)

20 _____ жылғы "___" _____

КЕЛІСЕМІН

_____ ҚОЛЫ _____

(қылмыстық процесті жүргізетін орган басшысының лауазымы, ТАӘ (болған жағдайда)

20 ____ жылғы " ____ " _____

Қылмыстық-атқару жүйесі
тергеу изоляторларының ішкі
тәртіптеме қағидаларына
16-қосымша

Кездесу өткізуге арналған бөлмелерді жабдықтау

Кездесу өткізу бөлмесінде сөйлесу құрылғысы бар кабиналар орнатылады.

Әрбір кабина ені 80 сантиметр (бұдан әрі - см) және ұзындығы 1 метр метал каркастан, қалқан элементтерден және үстел мен қайырмалы орындықтардан тұрады. Кездесуге екі туысы балаларымен келген жағдайға 2-3 кабина ені 140 см жасалады. Барлық кабиналар өзара еденнен төбеге дейін қалқамен бөлінеді. Кабинаның каркасы және қайырмалы орындықтар бұрыштық және жапырақшаболаттан құйылады, үстелдер ағаш талшықты плиталардан дайындалады. Кабиналар арасындағы қалқаларбиіктігі 80 см мықты тақтайдан сыртын пластиктен қаптай отырып жасалады, ал одан жоғары олар органикалық шыныдан жасалады. Туыстары мен қамаудағылар арасындағы қалқаларда екі жағы шыныланған декоративті металл тор орнатуға жол беріледі. Келушілерге арналған кабиналар жеңіл жабылғышы жоқ есіктермен жабдықталады.

Кабиналарблоктарының шетінде есту, ескерту және сөйлесуді үзуге арналған құрылғымен бақылаушының орны жабдықталады. Кабиналардың саны 10-нан асса бақылаушының орны кабиналар блогының ортасында мықты металл тормен жабдықталады. Бақылаушының жұмыс орнының ауданы 4 шаршы метрден кем болмауы тиіс.

Қысқа мерзімді кездесу бөлмелері терезенің саны бойынша перделермен, суы бар графинмен және стакандармен (келушілерге арналған), қабырға сағаттарымен және бақылаушы үстеліндегі күзет-дабыл сигнализациясын беру құралымен қамтамасыз етіледі.

Қылмыстық-атқару жүйесі
тергеу изоляторларының ішкі
тәртіптеме қағидаларына
17-қосымша
нысан

Күдіктіні, айыпталушыны немесе сотталушыны тәртіптік изоляторға немесе уақытша оқшаулау үй-жайына қамау туралы қаулы

Күдікті, айыпталушы немесе сотталушы

(тегі, аты, әкесінің аты (болған жағдайда), туған жылы)

_____ режимін бұзуға жол берді (жіберілген бұзушылықтың уақыты, мән-жайы және сипаты) "Адамдарды қоғамнан уақытша оқшаулауды қамтамасыз ететін арнаулы мекемелерде, арнаулы үй-жайларда ұстау тәртібі мен шарттары туралы" Заңның 39-бабын басшылыққа ала отырып қаулы етті

:

Режимді қасақана бұзғаны үшін күдікті, айыпталушы немесе сотталушы

_____ (тегі, аты, әкесінің аты) _____ тәулікке тәртіптік изоляторға қамалсын.

№ _____ Тергеу изоляторының бастығы _____

(атағы, тегі, қолы)

Қаулы маған ____ жылғы " ____ " _____

(күдіктінің, айыпталушының, сотталушының қолы) жарияланды

Қаулыны жариялады _____

(атағы, тегі, қолы)

(келесі беті)

_____ тінту жүргізді

(тінту жүргізген адамның қолы)

Салынған жазаны орындағаны туралы белгілер.

Тәртіптік изоляторға ____ жылғы " ____ " сағат " ____ " " ____ " минутта қамалды.

Тергеу изоляторы бастығының кезекші көмекшісі

_____ (қолы)

Тәртіптік изолятордан ____ жылғы " ____ " сағат " ____ " " ____ " минутта босатылды.

Тергеу изоляторы бастығының кезекші көмекшісі

_____ (қолы)

Қылмыстық-атқару жүйесі
тергеу изоляторларының ішкі
тәртіптеме қағидаларына
18-қосымша
нысан

Күдіктілер, айыпталушылардың және сотталушылардың жазалары мен көтермелеулерін есепке алу кітабы

_____ ж. " ____ " _____ басталды

_____ ж. " ____ " _____ аяқталды

1-бөлім

Жазаға тартылған адамдарды есепке алу

р/с №	Т.А.Ә. (әкесінің аты болған жағдайда)	Жаза не үшін салынған	Жазаның түрі	Жазаны кім және қашан салды	Ескертпе
-------	---	--------------------------	--------------	-----------------------------------	----------

2-бөлім

Әкімшілік көтермелеген адамдарды есепке алу

р/с №	Т.А.Ә. (әкесінің аты болған жағдайда)	Көтермелеу не үшін берілді	Көтермелеудің түрі	Кім және қашан көтермеледі	Ескертпе
-------	---	-------------------------------	-----------------------	-------------------------------	----------

Қылмыстық-атқару жүйесі
тергеу изоляторларының ішкі
тәртіптеме қағидаларына
19-қосымша

Тәртіптік изолятордың сипаттамасы

(уақытша оқшаулау үй-жайының)

Тәртіптік изолятор бір адамды ұстауға арналған арнайы жабдықталған камералық үй-жай. Едені ағаштан жасалған. Есігі түрмелік құлпы бар камералық типтес.

Онда "көзше" қарағыш, тамақ беруге арналған желдеткіш жабдықталады, сыртқы жағынан вагон типтес құлып орнатылады.

Тәртіптік изолятордың мөлшері 0,5-0,5 метр металл торы бар және сыртқы жағынан қалқан-жалюзі бар терезесі болуы тиіс. Ішкі жағынан терезе тормен оқшауланады. Электрлі лампа есік үстінде қуыста немесе төбеде бекітіледі және металл тормен оқшауланады.

Тәртіптік изоляторда:

1. Қабырғаға жапсырылып тұратын, ал тұрғаннан жатқанға дейінгі мерзімде көтеріліп, бекітілетін ағаштан жасалған жататын орны бар металл кереует;
2. Еденге немесе қабырғаға жапсырылған үстел және орындық;
3. Санитариялық торап орнатылады.